



勉菴集
五

~ 16
2374
5

共二十三



和
2374
卷23-5

勉菴先生文集卷之九目錄

書

與奇會一 字萬○六

答鄭厚允 載圭○六

答崔元則 叔民

答宋聖澤 榮淳○三

答鄭季方 義林○九

答李禮伯 教文

答鄭周允 冕圭○二

答吳德行 駿善

勉菴集

卷九

目錄

一

勉菴先生文集

答曹而敬 錫休

答權舜卿 雲煥○二

答鄭景方 昌林

答韓希殷 序致

答梁擊霄 杜承○二

與朴河東 基昌

答抱川儒生

答朴成如 義成○二

答李公執 璵在○二

答郭龍卿 致教明輔 致海 聖宅 定鉉

答李漢儒 承膺○二

答洪汝章 大心○二

答李仲熙 光教

與柳汝聖 麟錫○二

與李文仲 根元

答俞瑞九 鳳在

答尹雲瑞 錫鳳○六

答金景尹 樂道

答南宮聖益 維

答洪思伯 在龜○二

答柳聖存 五 一〇六

答申聖淡 棟〇四

答洪範五 雷〇二

答姜景夏 健 普

答姜伯三 復 普

答曹衡七 垣 淳

勉菴先生文集卷之九目錄

勉菴先生文集卷之九

書

與奇會 一字萬〇乙亥九月

路由尊尚曾歎題鳳偶於逆旅旋喜識荆人生會合
知有前定伊時返稅安重向後節序屢變重侍萬寧
棣歡佳福遠外溯糾不啻如渴求飲也益鉉歸伏田
間奉率團樂萬念都消惟欲親近丈席恭承聲咳俾
開昏愚之萬一而第親年非遠遊之日亦以羣吠傍
伺難容舉頭只切愧歎妄枉丈席書中有所云幸於
趨庭之日從容俯稟俾為終身佩服之資則受賜多



矣

與奇會一辛巳十二月十五日

益鉉頓首尊祖考蘆沙大爺喪事豈只邦國之不幸抑亦斯文之無福凡在冠儒服儒而具仁義之性者莫不氣塞而涕零况執事服襲家庭董陶禮法之場探索道義之窟所存所養必有非餘人所可窺測者則當此之日悶吾道之無託痛餘響之益遠掩抑結轡不能自己者奚啻一家天倫之情而已哉士友之期望在執事者實不尋常幸須千萬自愛善繼善述使一線陽氣不墜於地則亦豈非先生平日之所望

於後人者乎益鉉生還田廬奉老孀幼稍可慰懷而但山家生涯日出多端尺紙奉慰未克趁期因循至此撫戀疇昔辜負實多只祝因時加愛以副相思

答奇會一辛卯

類編六冊蒙此下惠政大君子公天下之心而非只為一人私也顧淺薄鹵莽老而無聞不能洞貫底蘊而資其受用則不惟孤執事者眷念亦豈先生平日所望於後人之苦心哉拜受自反深切兢惕耳朴君妙年秀發視千里如門庭其志甚壯由茲以往勤做課程開發見識則於以繼述家風豈不綽有餘地乎

誘掖勸獎如門父兄者惟執事在焉別離之場爲勸其廢却漫間人事類頗請益於懿文之地未知能著膺否也

答奇會一 丁酉九月二十九日

曾謂三山是今日福地百千蚊蚋莫敢奈何聞說如此世間事真無不有也豈仁愛上天不忍於人類糜爛而故遣此輩鼓發激厲爲出而扶持之意耶向逢泥場鄙宗說及往事見謂若無斯人湖南全省殆置顏無地矣此實忠厚長者語也若使人人而如是國其庶幾乎益亦年來坐在此窠臼中同門之誚鄉鄰

之謗殆無虛日而疲軟伎倆專以無卞爲主則又以謂近於鄉愿而益加凌踏說難之歎自古然矣奈何長興僉少年一見可知其淵源中出來執事培養人才之力何如是盛也至若千里迂路問及賤陋則過之過矣無乃執事之吹噓失宜而反迷後生輩趨向好惡之正性者耶還切悚仄

答奇會一 丁酉十一月二十七日

國賊未討 因封已過俯仰高厚只切痛隕先集重刊其義云何掃塵之役雖無限極已往竣事十分固全或者編摩規例別有更商抑多少漏落合有補入

若續別集樣子耶華翁遺稿固是此世間有數文字而畿輔物情非只事勢之不及都是風力疲軟同心協力萬無其望則思欲一造清軒說盡心曲而氣不從志無能為役承此提教尤以見執事憂道傷時廓然大公之心出尋常萬萬也益鉉命途漸窮去九月又哭朴楊口丈同門先輩於斯盡矣隻影踽踽將何依倣金君溫雅愷悌甚不易得至若闡先一事何等審慎而顧乃不擇寒程遠役誤及賤陋則豈非无安之過舉也耶悚息悚息

答奇會一已五六月

潭友先至家兒繼焉謹悉問來起居之安手命荐辱拜荷益摯先集重刊竣役至此非只斯文幸甚大賢脚下善述志事歷數古今更有幾人深切歎仰此漢少不勤讀老便自棄循其本末只空空一庸人耳執事之所洞悉無餘而乃於今日有此萬不堪任之命自家之愧汗悚惕固所不言有識傍觀其以執事此舉謂將何如欲更吐情實以請還叔則枝葉之繁都歸文具姑且專閣從當與嶺下諸友往復商確後當有仰告諒下如何服齋實紀弁文不容圖免塗乙以呈其間似不無一二句語添入條件而原稿文字追

思不起幸勿歸以已成之文而亟加刪潤俛免大段
妄發千萬千萬

答鄭厚允

藏圭○辛卯

謂外乎命矣但以感頌言哉居爾秋屆蟬聲益高伏
惟味道起居願養萬迪日與令從氏及同志僉賢磨
礱講質上達于高明光大之域而自有人不及知之
妙矣攢誦何已益鉉依樣潰劣無足可稟只歎食乾
坤寄此身命凜然若虎尾春冰難保其不倒東來西
而守得本分地頭是用兢念耳

答鄭厚允

乙未七月十四日

前後俯教警發多矣仁人之不能忘世如此至如賤
子迹列侍從當茲大變死固宜然生亦何樂而包羞
忍恥苟活度日豈曰道理顧膚淺伎倆頓無先輩之
萬一拳踢者妄作依樣徑情直行固所不能設有甚
麼意想是得其地得其人有許多兵食措處然後事
無此數者而其以輦轂百里救死不贖之低殘士類
先尅虛聲有病機事者無言其成敗利鈍之如何恐
非臨事懼好謀成之義諦也故愚竊以為與其進而
無甚發揮寧退守一身不染汚俗只與意中士友同
寅協恭用答我 列聖培養之澤者為可穩當而省

事也外此而有別件道理可扶 宗社之萬一云者
則敢不趨走下風痛改鄙見為補過之地乎

答鄭厚允 丁酉四月七日

過境擾攘勢使然矣天實為之吾心秉執斷斷無它
餘外喙喙何足煩齒牙實可賀而不足慰也俯教敢
不聞命蓋朋友人倫列於五典古人之從事為己者
莫不以此為重則雖甚蒙陋曷嘗昧然於德愛與姑
息而甘置身命於作非之科乎只本事曲折決非遠
書所可張皇且其大槩欄柄龍友抵執事書一紙本
領田地露悉無餘而人之從違不一其揆則亦未保

其容易脗合只覺浩歎而已

答鄭厚允 戊戌四月六日

二生叩門先聞邇來氣候之大槩康安惠翰荐辱感
荷益摯賢胤所苦似是皮膚例證計當不日差完而
才說病字都非好消息為之貢慮無已益入此年來
村疹室憂開眼無日繼以出後子忽嬰惡疾安危存
亾迫在眉睫是必人事之有多少敗闕而致天意之
大加警動也只當坐而待命無他別樣道理奈何教
竹村文字題目鄭重決非踈漏無見識人所可率爾
犯手則其在流光百世取信後來如尊喻之地宜其

十分審擇不可苟且者斷然矣且以執事之量我淺
深奚啻昭昭而為人謀忠之地何其泛然若是任其
險程遠涉也耶語雖不恭相愛之深故不能無多少
致憾也李河物故聞極驚愕善人不壽大運所關謂
之奈何

答鄭厚允

庚子十一月八日

別紙拜領夫以先生之感德大業為膚淺蹇拙輩筆
端塵穢極知其罪不容誅而事既到此則折衷斷案
不可不一經僉執事梳洗整頓後乃已故敢以仰呈
承此覆教豁然警發不啻大寐之得醒固當改圖而

其於鹵莽苟艱脫不得自家窠臼何銘句重疊誠如
來教而頭辭之以斥洋事謂明理中一事而已則恐
未釋然蓋以倡主理之學任闢邪之功二句意思雙
下說去者似甚平正而又未知意下之如何要待松
沙付籤來到參商成一本當更覆耳

答鄭厚允

辛丑二月十二日

文字抵評蒙茲鄭重從前不慎之罪可以免得一分
心焉感悚固知攸喻起頭銘句尚未入思蓋向云主
理闢邪四字未始不頭腦所關而更思則人將曰二
先生前都是主氣之學而無主理者耶云爾則面前

體例亦不可率爾斷案又捨此一欵則在先生分上無甚分明未知何以措語然後可免大何第當就次仰告也爵謚事略聞梗槩則始自朝論而天意能念及云此亦長夜中一雷消息也耶俯教多少以執事之諒我甚悉而處之以蚊負之役徒切汗顏耳

答崔元則

敬民○癸巳

辛卯臘壬辰仲秋今三月並三度手教二則至以歲首一則承於夏半雖有遲速先後之別其為慰感則一也至其說盡心內事委曲條悉雖一室情義何以加焉愚陋之得此於執事殆暮年光紫也割半之痛

在尋常凡夫猶云難堪况如執事以篤倫之誠兼道義之資而為平生知己弟兄者乎閱歷有素每懷作惡忽奉來教殆注然出涕不知以何辭奉慰也至若墓銘之教殆執事妄言大嶺以南名位道德巨匠林立闡幽發微慨有餘地幸加三思

答宋聖澤

榮澤○乙亥

瞻誦如渴料外忽奉八月十月兩度珍函謹審伊時侍候珍衛第賢閣患祟非輕極用仰慮未知間來苦歇更如何益鉉親齋當寒頗復焦煎何言賤狀坐在敵國中其所凜悸不啻淵冰固無餘力可仰首伸眉

以挑厲階而且念前日之舉不過一場狂疾所致豈足彷彿比擬於行箴語默等節有若來諭之云而受而為安也此中知舊亦未嘗不有勸之責之期欲更提時事以盡吾分如老兄所諭者而愚意則前日事是大經大倫所關雖斷頭陷背猶可說也今日事不過是誤國奸細輩操切舞弄之常態病民戕國一也而權以輕重則前者重歟後者重歟笏以論事者言則不可以前後異同有所間矣至於賤漢則到此地頭尚未叙用又無言責而故犯禍機不顧老親不念朋友重作嶺海斧鉞之慘未知其十分稱當也知之

者疑之以前銳而後惻不知者謂緣指使者作此舉矣而其人已死則渠更無可恃者而不敢出口云是皆人情世態不為無見而在吾之道則何可以此而動心也哉然若其大段去處恐不可一向泯默耳鄙見如許未知如何若有未當更乞指教理氣之云真可謂問日於瞽也設有定見何敢容易開喙以犯汝我之譏乎笏當熟復玩索以質所疑於高明耳先生文字中大義所係數十篇可蒙瞻惠否若艱於書役則與朴友相議為之如何

答宋聖澤 丙子七月

省禮賢閣喪逝伏惟伉儷義重悲悼何堪幸須十分
節抑無或致損朋友區區之望也仰寬庭闈俯恤穉
幼勢難給他乃遠貽手翰問存孤危且其辭旨從容
整暇不以患難憂戚而有少移動甚盛甚盛累一涓
流也淺坳也弱水也濁河也有此四者而妄藉一葦
之行遽欲擬之於海而論其形之大小量之淺深則
海必怒之曰余雖有不擇納污之量初不與四者之
類同其功用云爾於斯時也雖欲賴之其可得乎設
或不然而旋卽辭之曰爾雖有四者之累而乃其志
則未始不可尚故余姑弛其灑灑白馬之險而使之

假息於瘴霧窟穴云爾則是可曰賴於海矣而其所
賴焉者終不免艱辛苟且而不悛活其必消流而積
累之淺坳而開擴之弱水而振發之濁河而攪澄之
浩浩蕩蕩有同於海而無愧者然後海必帖然無異
辭而吾之進退泰然若行其所無事矣是則謂之人
賴於海可也謂之海賴於人亦可也然是則不容易
也且竊以為賴於海者海盡則無可證賴於人者人
亾而言不變故襄陽魯連非賴於海者也賴於夫子
及史氏者也累之今日非賴於黑水也賴於吾兄不
知惡之論也若以吾兄慨時之意欲遂入海之計則

當操管潤毫伸紙行墨作可惡可怕二三句語忤時
忌而干主聽然後可無難矣而此則不為徒有健美
之意者豈非實欲不賴於海不賴於人賴吾大中至
正之道之為悠遠而真實也耶可呵可呵伏惟茲辰
水菽康寧侍餘暇候更何似纍親候久阻賤狀為炎
鬱所困者字等節專不成樣可謂虛負此海耳旱荒
如許而凶醜橫行吾儕性命將不知稅放何地奈何
奈何睡隱錄及牛山集荷此借寄一番展閱可見古
人之為國家生民慮者至矣何處更得來耶朴友相
守切磨甚慰旅懷今忽分辭張不可言逢場須勸其

不作無益向裏用功如何

答宋聖澤

丁酉十一月十一日

李烈士立懂事曾竊耳之而未得其詳今讀原狀與
傳文殆取云一字一涕也秉彛所均能不知感其在
僉君子扶植維持之責金石事誠可急而不可緩者
至其捨執當世文事之牛耳者顧乃謀及於醜差不
齒之地則得非欠商量沒事面而反累稀世之大節
乎特以中心嚮慕之私則或可因此而附見故湊合
杜撰冒沒露呈幸望曲加刪潤俾免大何則幸矣如
日也然之作不容措手云爾則決非以德之愛也

答鄭季方

義林○已丑二月十五日

益鉉稽顙廢蟄蹤跡重罹禍罰踰高踏厚與死爲鄰
于斯時也雖例凡寒暄字猶可動色而增氣矧天外
珍幅除却多少事眷眷以向上一著提撕警策於洪
沉懷襄之中而期免胥溺之患者乎予以見愛人以
德不遺管蒯之感出尋常萬萬也顧此蹇劣猥得皮
膚邊好聲稱而肺腑內實工程一無可向人道者特
以好不知惡如執事每以過情之言惹出紙墨致煩
人眼則得無有損於一言之知也耶自茲以往刊去
枝葉惟隨事攻闕俾免大何則是執事之賜也教而

先生道德造詣固非管見所可窺測而其於理氣帥
率之分破世儒膠擾之病得千聖密傳之旨則自潭
巴以後未有盛焉而人鮮知德時象日乖褒揚崇報
之典尚此寂寥百年公議雖曰在前門生私情猶不
若於吾身親見伏想執事亦同此懷矣

答鄭季方

庚寅十一月

葦門飲水課衆進業有足自樂當此懷襄時節其為
清悵倘復如何深用健羨先夫人文字顧此蹇劣空
踈亦吾兄之所熟量政所謂託非其人而乃其愈往
愈摯逃遁不得則茲敢率爾犯手非只於吾兄意下

有所未妥其貽累先徽受人指點亦非細事望須深加斟酌以為八用千萬幸甚俯詢疑義此無素講而強有云云則亦不諒之甚也故置之心中以待後遞

答鄭季方

辛卯三月十二日

井曰新移凡百草創同病相憐尤用貢闕夫以大聖力量尚有棲棲之歎矧是吾輩上不及仕下不及農而欲安保七尺軀命者豈易易哉其生其死只得付之司命者處分而已漫語及此想應一哂也重省兩翁見帶昔樣而但於年來議論攜貳轉輾放闊莫可收殺誠是斯文運數也蓋莘西先生平日甚愛尤菴

說心有以理言以氣言之訓而為千古定論深排主氣之謬反為世所擠矣然兩門緊守師說少無異同及至近日省翁粹變舊見至以先師為不知物則之分重丈駭然大責則省友頓無從頭更商之意而斷然自是于今數年少沒變動平地波浪止息無期甚非細事豈義理無窮人見易差而先師議論或有未盡者耶只待百世之公論而已

答鄭季方

辛卯八月五日

教省翁携貳曲折只在不信先師平日心有以理言以氣言之八字斷案而降以近來時論為其折衷則

以重翁片片赤心猛火熱熱底氣像或不無過情越
界苦心逆耳之教已屬多端其次一二諸賢之議亦
多不滿之意間有多少云云而淺陋愚見乃忍住不
得略貢首尾大槩矣不意緣此轉輾層激而無望保
合則只當守口結舌任他雌黃如來教之外恐沒好
道理矣大抵蘆蔭兩先生道理問學決非此漢所可
措筆安議而要之為天地立心為生民立道用成一
治可達質俟百則彼小小屈伸又何足置意內而為
欣戚耶

與鄭季方

辛卯十月二十六日

九野寒威陽德潛藏伏惟味道啓處神佑百福嚮自
河南遞到新刊類編及松沙問札盤擎摩挲尤以見
諸君子衛道尊師之誠出尋常萬萬決非餘人所可
仰及由是而爵謚也書院也將見其次第舉舉俱無
餘憾豈不甚盛如不佞輩為師門地於斯三件一未
克生意並與其身心內修之政而分離橫決莫可收
拾誠不可抗顏對人也只有近日此中儒論謂書院
復設若待 朝家成命則俟河之清惟各就其舊址
設壇私享於目前道理庶幾近之而未必不為後日
之兆此其禮制雖無已例有其舉之無其廢之自有

往訓則於公於私庶無妨礙而間有曰不然者時王
典式不可改也未嘗無從中沮敗之慮而人心所同
悅之者衆豈么麼邪論所可移動也耶此是公共道
理而非一人私故漫以告及

答鄭季方 癸巳八月

益鉉老境踽踽百感彌中已不可好况自居而不幸
去春又哭首齋老友五十年同門契誼尚屬餘事金
精玉潤之姿通明縝密之工更覲於斯世耶惟於先
師定訓再數廊柱致得無限波浪非只此老身上爲
可惜誠大道屈伸之一厄會重以重翁捐世廓清消

融無人任責則尤豈不百倍痛恨者乎來諭多少際
此入眼讀來反復可謂先獲我心若非物我無間底
力量何以及此只吾儕之苟全性命特在天翁而垂
兩旨風一網打盡十口契活溝壑在前奈何奈何

答鄭季方 乙未四月二日

千里惠音感先於慰不知攸謝流離之患兵餘宜然
殊令人念不忘也繼此世變之無窮有難測度而易
放者人心則亦不可以已往之能而慢將來之戒也
幸雖倉兄顛沛之際必以古人獄裏尚書舟中大學
之心爲心益讀孟朱書使禮義廉耻之說浹於肌髓

然後可以應萬變而無錯矣蓋衰世人物每患委荼不振且今邪說橫流毀冠雍髮之時苟非明禮義以固其志勵廉恥以樹其節則一蹉跌之間化為禽獸鬼魅而莫之救矣此意與諸士友努力講究如何老物七十已近日見 宗國傾敗先王典禮一朝掃盡而毀形之禍又在朝夕只得牢守舊衣力存短髮以歸見先聖先王於地下無他說也示正卿云云昨歲七月果有此事而盖丙子和洋以後後之秉春秋之筆者必不當以舊日小中華待之而猶吾 君無恙典禮不滅則士君子之生乎此時仕乎其朝者雖不

光鮮而猶有可諉者盖已講和則一邊存交鄰之說一邊講自強之策以收柔榆之効為未大害也至夫甲午六月二十一日後則賊臣挾倭劫辱 主上羈囚一隅一命一令不由逆賊則由於倭盖此時國已亾而所存者虛名耳所行者偽制耳苟有一分人心豈肯冒受其職為彼之卒徒哉愚見適然故初不受告身職牒而又禁人區區稱號則來教所云固辭不就亦不暇說也人又疑職雖不受而言則可進此有大不然者夫進言當於六月以前自六月以後固無進言之所此義恐無以易之矣未知尊意以為如何

答鄭季方丁酉三月九日

家兒還自門屏能傳其耳襲目擊於言議風采之末者甚詳且悉又致其高山景行之情而眷眷不弛足見秉彜之一端迨此世界未死殘喘無可寓懷惟茲一著可醒耳根雖謂之不虛作此行庶無愧辭矣龍溪云云以此以彼豈敢愬然若路人耶外雖強合內不能洞然者一則素性疲軟不可與天上天下惟我獨尊之人同寅而協恭也一則省翁之變動師訓決是見識未及力量不足之致斷不欲背馳華翁如黑水餘派之焉者則又豈忍雷同苟合垂五十年兄弟

之義而學彼之如脫樊礙者乎是則雖欲強之而不可得也松沙杜門深谷木食澗飲而為畢命之計者自不勝欽仰萬萬先生之靈若有在者豈不莞爾此外倭洋輩一類人說話不足掛齒牙間也書后日富伏惟間者味道起居更何似及門諸益並為佳適迨此之時養得多少俊彥於巖穴之中以奉天畀政晦翁所謂非天意之偶然者甚感甚感益迫近榆景百惡俱備謂之病也則便不新奇謂之未也則又非其實良覺可憐耳安友所教辭不得謹依樣本狀付去而屬字之間專不成樣幸加介正不至大段疵類千

萬幸甚

答鄭季方

戊戌

冬暖呼寒年豐啼飢未了之憂未便之苦想其多端而靈臺主人翁恒惺惺無怨尤之意殆願學而未能也安友雖未及顏淡知休休斷斷優其為善類承此惡報痛矣痛矣聞其三蘭方茁後事有託指引責成執事在傍稍可慰也益鉉患難餘悸今雖少息而神魄圍圉去死不遠且自九月以來姓名三字忽為化黨所提起職名來侵無地措身不得已露章丐免而離索孤陋做錯多矣謗言之來固其所也而間有不

近人情者苟能自修有素信在言前則感應之理又豈容若是乖刺耶愧恨而已去月又哭遜志無言其平日小小得失之如何重翁傳授更有其謹益切殄瘁之歎耳江北消息既為無事故國之期天日清明前似不容易重可恨也龍溪尺地阻隔已數朔矣同門朋友誰其在者長短相資始終不替政其願言而人心不如我心過情攻斥無根構捏令人疾首不忍正視未言其他只以重翁配享告由文一事言之鋪張德義因文寓慨何患無辭而必舉似此漢如噫嘻痛矣之一場臺啓然後始可為心說歸正耶重翁在

者其將以為何如人也自茲以往只有渠自渠我自
我不相較計不害為暮年省事之一道也未知如何
承此提示不可不略達衷曲以冀裁教

答李禮伯

教文○丙申七月二十三日

料表獲拜手命欣豁不啻百朋謹密間來尊候萬重
小小未安係是當夏例證計應過復區區拱祝益老
而不死進未能為討復之計退不克引分自靖苟全
性命息偃在床誠不勝愧赧萬萬何足奉况俯教無
論工拙之如何適值家兒之出門胡寫亂行專不成
樣幸曲加照管勿謂已成之文難於變改隨病點竄

務歸平實千萬千萬來稿草草覽過殊未通貫甚矣
精神之昏滯也

答鄭周允

晁圭○辛卯

益鉉猥以無似一及尊先師門屏造次觀感雖無可
言塵土賤品與有榮焉茲者寵命又出望外傾倒賢
腸無復幽隱整衿一讀灑然若江漢之濯但命辭之
徃徃過中君子一言之知恐不當如是無乃有病於
人有心腸箇箇熱甚而獨於君親大倫上一切冷淡
殆若風痺痿厥不干痛癢自不覺痛心疾首而發於
長歌太息者耶見今事樣孤軍弱卒雖不可一舉廓

清鳴鼓自守猶愈於全師陷沒今日吾輩可勉只此
一事而大運所迫時事日變將不知如何出場是庸
兢兢耳教本心難保四字雖是自道遠近士林受賜
多矣敢不服膺幸時加鞭策以警闕略自餘寒暄例
語姑置之

答鄭周允 乙未七月十五日

皇天不佑國事至此痛矣痛矣夫復何言昨昨兩年
垂存次第拜領而未即報謝方切悚仄茲於料外存
承不棄縷縷策引溢於言表蓋箴規之道廢已久矣
何幸於高明親見古人之道也竊詳屢教得非以此

漢為可動不動而拱手熟視者耶若然則非只士友
間棄物固亦國家之罪人今者可動階梯頓無一二
不可動底事面不啻八九而只攘袂壯談虛聲實禍
於公於私有何可補觀於今番龍溪之事亦可以反
三矣蓋世有反常之變則所以處之者亦必有至精
至微正大光明一定不可易之實理而學之不講莫
知為計幸僉賢劃一長策用以為鞠躬盡瘁死後乃
已之舉則僕雖疲軟當裂裳爨足趨赴下風而不辭
也其外多少說非遠紙可煩都在李君口悉

答具德行 駮善

鄙人於下沙先生只見伊川之面不能執簡侍瑟以承大爐韜之造化而秉爨所均江漢羹墻自不能已至其門下諸子所欲與會同周旋沾得麗澤之末光豈有窮哉顧以垂老殘喘有覩苟活同室戈戟駭機可怕杜門訟愆與影為鄰迺者猥蒙不避滾滾珍緘遠及陋巷三覆愛玩有以見均物我破藩墻之範圍力量出尋常萬萬至其處已過謙待人甚重而有不知惡之弊則竊為執事者不取也蓋道理無窮人見易差一息尚存不敢自信幸執事隨事提警期免大何千萬千萬

答曹而敬錫休○丁酉十一月二十七日

賢胤見讀何書姿稟也文行也見識也此之令人殆鮮其儔前頭長進曷可量哉尤以見尊門德蔭之未艾也健賀何已

答權舜卿

雲煥○乙未七月十四日

極變之教有以見仁人惻怛不能忘世者有如是彼離視宗社剝喪乃已者抑獨何心至如賤子亦未嘗無按住不得之大同彛性而咫尺殿庭無路可達苟存視息便同無事是可曰故國有臣子乎只恨一死之尚遲也近日咸課見在何書想積之又積日

新不已健羨何既益鉉年未及而衰先至門內日用尚不能照管及他矧其進於此者乎自餘只祝因序晉德以慰士望

答權舜卿 丁酉九月十八日

所懷伊人在彼一方可望不可親白首窮廬徒切詠歎即茲二彥叩門喜幸中意其有多少平安字可替對展詎意為樑上君子所攘而使兩邊腦次愕然失圖可謂不仁之甚者矣槩審年來學履珍勝進奉九旬篤老退講千古心訣蔚然有故國風韻者歷數此世凡有幾人南望馳神不能已已損末年迫棄榆一

無所就惟上下人紙墨口舌上者殊不寂寞蓋棺前事又未知有幾層節拍而學之不講到處窒礙者尤切兢兢耳此鄉又生一層風浪將應聞悉而未必其末梢之帖然頭痛頭痛

答鄭景方

昌林○甲午二月二十六日

益鉉蹇拙無取猥蒙尊從氏蔽疾匿過引置朋友之列與相往覆者揆以私分已極踰越加以尊慈亦憑途道不察其面皮腸肚之如許而曲垂軫眷有若相資則竊以為過矣蓋祖宗培養之德父師導迪之力何嘗有貴賤賢愚之殊而行之不力老矣無聞居然

與草亾木卒將無異同其為可哀莫甚每荷遠朋之
好不知惡者強加拂拭期欲納諸寡過之地雖甚愚
昧寧不知感竊念尊慈以蘆翁淵源近則有日新月
坡兩公相與唱和遠則有松沙僉賢觀善就正慙慙
乎洙泗洛建之講郁郁乎忠信禮義之場彼西洋萬
千輩何足蟬螻於白日哉風韻所及自不勝欽仰之
私也

答韓希毅

序教○乙巳六月

昊天不復 宗國至此其生其死安身無地言之氣
塞寧欲溘然况如執事乃豐沛舊民先王世臣耳目

所擊其為痛憤當復如何記下犬馬微忱不量而入
無恠其末梢之不善出場而辱身辱國罪實難貸謂
之奈何追服之說朱先生答人問謂意亦近厚近厚
二字其非得禮之正明矣退沙尤三先生亦以追服
未服之喪並有未妥之論則梅翁之以心喪或暮年
或三年之說未始不亦近厚之論而至其為自我作
古通行無疑則又未知其為十分定案若孝子至痛
斷自油然之性情而不能自己則只可曰無於禮之
禮亦可曰過人一等之行而非外人所可勸沮也鄙
意如是未知如何鶴谷文字愚之膚淺萬非其任而

致人遠役又出料外是則執事所以為人謀者太欠
詳審耳病枕手戰多少都却

答梁擎霄

杜承○癸卯三月二十日

有事先塋經歲故土伴春而歸崦嵫人事棲屑道路
甚覺無謂是致遠方知舊或者待之以陽界物事書
問枉存非止一再而並歸等閒漫不舉論不獨於執
事爲然想應恕量心焉悚仄如負大何謹審伊來制
體動止候神休愷悌存養玩繹到老彌篤衛武蘧玉
不獨專美已雖未能心嚮往之未嘗無一近懿文叅
聽緒論消磨鄙吝之願而有足如繫只切溯糾教示

媿媿搃是題外決非以德之愛望即還收至若先狀
文字弱駭載重短綆汲汲尤極兢慄而託名爲榮或
可乘隙奉副自餘在令抱口達挾感手戰不備

答梁擎霄

乙巳四月二十日

在旅邸時令抱左顧兼致惠翰分外眼青不啻百朋
而逐日紛聒不暇叙蘊尋以事出蒼黃莫省頭尾則
並以數字覆儀而容易闕焉設或關聽恕量其所結
轡殆若物在喉未下也茲又不意拜手命問慰篤
摯自牧之謙過情之稱令人汗駢莫知攸措因悉間
者靜養體候對序萬寧慰不容言益鉉休憊數朔迄

可蘇醒而諸般敗證式日斯急死不足惜而只喫齒
年徒做一負國辜恩底無用棄物良庸痛歎耳時事
將加一層聽聞甚駭又未知從前未勘者如何究竟
也病席叫苦略伸謝儀

與朴河東

基昌○辛丑八月二十六日

伏惟秋涼政體萬重不面而書古道也且事關義理
不可噤默則聲氣所同一通姓名或不至為大罪耶
河東山水鄙先祖孤雲先生之所嘗盤旋也遺風餘
韻尚有存者執事來莅亦當有曠感之懷也治下琴
川即先生俎豆之所而院宇見撤七分遺像櫃藏于

校宮而任宅蟬鼠黷滛者于今為幾十年何幸本郡
居崔廷鉉者慨然乎斯詢謀宗中為建祠尊奉之計
其志可尚而其事甚大以若綿力恐難有終且今人
心陷溺不知禮義廉恥之為何樣物事則後孫而篤
於報本土林而急於尊賢者果幾人哉上有好者下
必有甚焉興起斯文用扶頽俗執事恐不得辭其責
也幸望另念指揮不日竣役則武城絃歌奚獨專矣
於古耶益雖老朽竊欲躬進于落成之日而致謝于
執事也

答抱川儒生

乙酉

昨覆率爾當之未盡所懷從後思量鹵莽甚矣悚仄
何言蓋離視義理毀裂衣冠而揚揚自是謂莫敢謹
何者卽是聖門之反卒先王之罪人則大義所關天
命可畏且夫野史氏書之曰某年某日抱川一邑獨
以西洋之服享夫子之廟云爾則十目所視百世在
前雖傾東海之波何足以洗其累乎日前發文未及
此意而只以口頭說話略貢愚見者誠慮事機之未
必如是而虛名實禍之為可慮也何幸僉執事不謀
同情秉執確然指顧轉移之間黑死一局宛然有回
生底消息嗚呼此真不死之人心而常存之天理也

雖在病伏難強之中自不覺氣湧如山耳自此以往
僉執事責任甚重雖欲自小退托不可得望須牢著
脚跟少勿撓沮千萬千萬

答朴成如 義成○壬寅

禮尚往來略聞古語豈不卽地造候而家豚曾以十
二日發故山之行些少憂苦尚在皺眉塊坐窮廬只
切未便之苦茲拜惠狀謹審令體神休大度裕適慰
賀慰賀新聞事其間金老人下來一場所傳專是無
根說話豈或有一種好事人悶吾之舍口結舌期欲
百方勸出之計耶可笑可笑耆老叅席夫以草茅之

賤得近 日月之光豈不是至願所在而由前則罪
犯難言尚在待勘之中由後則多少凡百一不入量
有難振刷未免坐停設有論劾之端在所不辭而已
有何別般道理耶

答朴成如

甲辰

昨承惠存審息蓋還次大度依昔慰感沒量多少曲
折可待別時說剝床之禍到極如是痛迫痛迫中外
一般何以爲懷生事在平時雖十疏不起人或見諒
而未爲大罪今日處地既不克前此辦命則斷不容
越視養瘠而闕奔問之舉也雖死於道路復何憾焉

白首餘生偶來結社雖不源源心常依仰是可送年
事乃如是前頭生還未可預度則臨風引領只切悽
黯耳

答李公執

瓌在 ○ 丙子十月二十五日

昨夏邂逅雖曰適然如非高明詢莠之盛又何以得
此但伊時僕有大言失信者數事而旣無追補改圖
以示悔悟之舉則想未必不以為浮浪無據也茲於
全友來恭悉伊間靜候萬相詩禮叢中切磨講習殆
無休停爲之健羨何已累人向日過次又蒙令從氏
文厚眷俾免中途顛沛尚此感鑄不敢忘也而入海

以後則一日二日僅保殘喘他無足仰塵只親候久
隔自難為懷奈何除非遠紙可罄只祝加畜將就

答李公執

巳卯五月一日

一別五載懷注滔滔即於便到獲承華翰擊手三復
不覺紙毛只斯文數窮二三師友相繼卒逝實是朝
野之所同痛廓豈獨尊座一身之私也惟有不憚益
勤勿墜緒業正是後死者事未知如何謹詢日來課
候一規萬衛鄰聞諸益並得平寧否想親勝已咨警
益綽有餘裕其進無量健羨何已記下萬死殘喘蒙
還田里老親幸依前日氣力數三童穉亦免餓死私

分則千萬感幸其外日聞其所不聞甚覺寒心金溝
丈近作何邑耶丙子後漢未承候益切悶然耳餘惟
祝勉進德業

答郭龍卿

致教明輔致海聖宅定鉉○辛丑

西浦先生遺集得之若驚固當詳細卒業後有所云
云而輕易犯手追思汗顏如負大何不意僉執事好
不知惡輕載卷端而使此漢重犯不韙之科歎何及
焉益鉉年迫崦嵫百事廢弛晚始修覆尤切悚仄

答李漢儒

承膺○癸巳七月一日

成哀致珍函備悉御者壽春往返利涉極以為慰曠

烈士事尚矣勿論吾兄之尚德好義非只今世所不見抑求諸簡策亦鮮其對則所以裨補頽俗喚醒耳目者爲如何哉潑切健誦省老加我一年而涵養有素精衛完實一疾不起曾是料外卒局差異可且別論同門故舊之情一倍傷惻瑟瑟事亦無恠其然歟食天地目下性命尚不肯照管何暇思入於冷淡沒滋味之餘事乎總以言之皆是梧堂之罪人奈何奈何俯教云云鼻頭華表猥塵石面亦已濫矣且每事貴在記實以外便是贅疣不須急急但此事義理廣大規模宏遠不可涯涘而至若根本肯緊則在敬勝

百邪四字曾子之下學人事行遠向上亦捨此不得只當就方寸密切處審其敬怠誠偽公私善利之別加刻鋤培養之功正吾輩今日之急務不須屑屑於爲亦可不爲亦可之地而分却心力也荷相愛之勤僭易及此庶可見諒也益前患臂痛尚不退聽頽臥涔涔悶憐不可言至屏事既聞之但其脚下淵源不幾家零星湊合未有補其實用者爲可憂耳君敬又作泉下人仁者不壽亦時運所關痛如之何

答李漢儒 甲午七月五日

時事畢竟至此可謂有死之心而無生之樂矣白地

奔問雖甚無謂在家偃蹇亦所不安去廿五日由香山至牛耳再從家閱寶動靜則裏面曲折雖不能詳當寧雲峴方在圍匝束縛中一動一靜不得自由所謂政令盡是我內應五賊操縱威脅中出來不見其形其影自在痛哭痛哭寧欲無言遂還自其地今初二日黃昏始得入抵昨夕得從侄書又有偽爵之事老而不死變無不經來頭利福置之不論當場聽聞得非可駭者耶第觀來頭動靜處之之外別沒好道理矣

答洪汝章

大心○丙子十月

此漢初乏寸管獲以口舌干觸時事宜其上下積忤跋前躓後不暇論榮辱於其間矣乃蒙尊兄不以為罪汲引獎借強置無過之列先後繾綣迥出格外此是古人忠厚之風其為賤者之光矣嗚呼萬丈也峽駕計即還稅而歛歲酬接得無貽惱之端否楊根李友搬會之計聞有措劃甚庸萬幸而賢壻課事可得如意耳曩漢親老失養子壯不教未知稅駕何地中宵轉輾已難為懷重以蒲柳之質飽經風劫志氣解緩筋骨削弱當此寧靜看字之工萬不成說未知日後何以對執事也向日贖行致煩窮厨感愧交並早晚

生還當取道門屏以伸愚懷

與洪汝章丁丑正月三十日

病伏鬼門懷想深切歲新日舒恭詢辰下待餘尊體
茂膺休迪引進後學開蒙發蔽伊吾之聲洋溢溪谷
否恨不得一近刀席得聽緒論而用作弦章之資也
嘉陵消息亦萬安否聞其門下一隊偶與聖存有相
違言辭往覆形迹稍露卒難歸一云未知然否伏想
尊兄亦未嘗不有同然隱憂而其裏面細瑣坐在天
外無由聞悉只自悶沓當待奉晤之日可得破惑而
當此士林沮喪之日苟涉吾徒恐不可遽因微言薄

過而置之棄域未知如何

答李仲熙光教○甲申十月

益鉉禱故頗仍廢却人事雖知得謗於知舊間矣而
亦無可奈何茲者李生袖傳七月旬日八月九日兩
度華函披展再三首尾數百言無不自傷時憂道守
己拯人惻怛慈愛腔中出來甚庸敬服其中論近日
事一款通透磊落光明正大真可以考諸先王先師
而不謬質諸天地神人而無疑是正目前易知底物
事而舉世滔滔迷不覺悟至此之甚亦豈非大運耶
關也歟日前得省齋別紙其所縷縷一切是忠告善

道者而亦不無若干條不相悉者其以道途傳言疑此漢之桀桀時論林於禍福而為依違苟且之態云者誠不知其遣辭主意之如何耳嗚嗚則近於發明而未必無張皇故只以實事報去而亦未知作何樣者也或人事盛論及之固不可默然無覆而在吾兄處地則只以孟子以仁存心章末端數三句為究竟法門其外子侄門徒及本洞主管人自當有處義之道而近日風氣亦豈能一一責之以十分中正也耶

與柳汝聖

麟錫○戊戌正月二日

益鉉頓首頃伏承先夫人訃仰慰未及而世禍罔極

彼此所經可勿言已矣第念今日之變履霜已久無容更恠惟疇時以為不懼者賴有重省兩翁而已自夫人之俱亾殄瘁日甚極其終至於座下之身而百責攸萃所值尤難決不可循常守經談笑而道之耳然則座下前日之舉實所以扶持綱常培植義理使天下萬世有以知君臣之重華夷之嚴而為功於斯文亦大矣彼不知此而徒執終喪之說以疑座下者小之見也惡足與權天下之事哉如益鉉之愚少不學道老而昧方一舉足之間輒多做錯竟至人言峻發本末盡露每念尊從叔省齋在時類賜規誨裨益

實多今此紛紜亦緣倚無強輔以致不能盡善尤不
禁俵俵慄耳仍惟益鉉與尊從叔結髮相交安託知
已伊來四十餘年未見有罅隙可議處獨於心說請
補之論不敢苟且雷同所以有多少曲折然所信者
其尊師衛道之誠而所爭者不過議論間事而已若
執此以爲非言下聽順者乃是攻斥乃是誣陷至目
之以黨小人而不復觀其大體竊恐尊從叔平生心
事絕不如此座下以爲如何然此不足爲今日大事
當擇一閒時作數行文遣兒輩祭告于墓耳最可怕
者無論時象之有形無形目下切急如水益深未知

何如則當處得善不至有大過耶餘生不多所願得
正斃而已幸勿相外指示一二亦願座下益講義理
益篤所守以究未盡之業以惠斯人之徒是今日之
幸也弘菴喪逝痛何可言同門長德惟此文如魯靈
光今更無觀古典型之地矣嗚呼悲矣首齋集聞已
刊訖一帙之分未可營耶懷緒千萬非紙墨可旣何
以則一得相對叙此裝積只祝爲道自愛

答柳汝聖 乙巳五月七日

病廢孤子謹其依賴誰其顧恤是則雖在患難奔波
之中所欲與之周旋稟咨免得大段錯誤者豈有窮

然而既不可得則循始迄終冥擿而止仰想執事亦當惻然動情而繼之以太息也不意吳友之枉獲拜情緘滿紙津津令人忘倦罔非藥石歷陳已往之失而申之以息黥補劓之道苟非至誠惻怛之本領何以及此感領二字尚屬歇后語蓋當初作為有十分可已而不已者亦有不可已而已焉者戀結 象魏遲遲其行雖是古人去父母國之道而及其 天意之厭薄不以為緊則固當即地告退而未克見幾則來頭禍患固其自致尚誰怨尤第聞臯比新占谷雲非只此時乾淨處之為可貴墳墓親戚不遠伊邇者

真老境活計也為之仰賀

與李文伸

根元○已亥十月一日

自省翁云遊益鉉之不能與汕東諸公相聞久矣諸公不負我而我負諸公咎由我作不暇尤人然諸公之棄我亦過矣蓋諸公疑我一則曰戊子別紙也二則曰重菴祭文也是尚及省翁無恙時合席說破心裏不曾有一毫疑脉亦省翁之見諒而諸公之已知也惟不絕匪人一事不能解諸公之疑然益鉉與此人所處與諸公自別且不能無庶幾改之之望姑不若隱默以竢之是益鉉之心也至於近日終不免作

一書與之當須相忘於心終戚戚不能悵彼若改過
會當許新未知古君子待人之道畢竟如何也先師
文集刊役向見通諭意此等事未易爲力方欲遣人
相探已而兒輩出他經月旋當潦災而未克矣近從
海西士友得聞役已告完益鉉在門列目不瞑而
見成此事爲斯文大幸然益鉉在諸公未嘗不有一
日之長而全然不能與愧恨之極復不能以顏面對
諸公矣雖然在此足以見諸公誠力之所到而以若
綿力何能成此大事又何能奏功之如是速也仍念
鄙曾祖碣文是在先師病時所撰而重省兩翁孀其

文體之不類初欲拔出於原稿後因屢請於重翁得
其潤色而復入未知存拔何居且繼此之急則重翁
文集與合編書也可有餘力更能及此經營否只切
懸懸穀菴客遼欽仰高義想是同情而棲棲之狀不
見可圖况也之歎復何益哉益鉉病伏歿歿朝暮待
符而已家侄行略此倩候只祝保重

答俞瑞九 鳳在○辛卯

今茲之會政是窮陰中大來底消息也東韓數千里
庶保得小中華舊名雖嚼顰跛躄豈不增百倍之氣
哉是則執事扶仗大義鼓發頽俗之高風偉節誠曠

世一有而亦非鄉中諸賢衛正明道之誠出尋常萬萬又何能盡底該志若是全完也尤可見秉彛好德果無古今物我之間也或謂以事不由朝廷名不載祀典事面猥屑體秩苟簡而病之者真蟪蛄之知而坐井之見也何足言即欲翼進參聆緒論而廢蟄之蹤不合濳穢於衿佩之列委送家兒替達東曲庶或俯諒

答尹雲瑞 勸鳳。己丑正月二十六日

稽顙客冬頰覆寧不知感適以歲暮出在墓庭闕焉稽謝心常悚惕殆如物在喉不下也居諸電奔歲華

載新仗惟是辰孝體萬衛胤友安侍勤做底下大度並得佳勝哀溯無已垂諭多少有可從者有不可當者師門身後事之不容苟且誠大中至正之論敢不聞命至若兩門論議之消齟歸一觀其面勢雖使假辭子貢率難變動况此麤淺之見齟齬之論豈望一分有助但天理難誣而百世之公議在前則未知許多紛紜其將待先師而定頓乎抑以省翁新論而定頓乎性與天道是夫子之所罕言則固不當一毫忝干於其間以速汰哉之誚特於師說被誣之地不容會忍略有云云畢竟戈戟相尋取困莫甚是亦運氣

所係奈何奈何如有好道理更示之千萬孤子僅保
軀殼餘外事無一可奉溷尊聽少不自力晚始悔恨
何及之有只切窮廬之感耳竒友千里雪程重到師
門風力可敬而可畏也

與尹雲瑞已亥九月三日

東西相望雖未源源中情依仰不啻若頽流砥柱一
自臯比南遷山阻水隔只麼書信無階可憑重以世
變層疊民國事樣窮到極處一段陽脉掃空乃已則
慨先輩之益遠念高節之莫追每風雨鷄鳴之晚春
煖秋涼之辰自不勝引領望雲采切緇衣之誠也乃

於近日始因道路往來槩伏悉味道起居一例萬衛
定頓杞菊信從日衆講道服禮鄉俗丕變蔚然有齊
魯洛閩之風使重省兩翁而在者豈不莞爾而謂吾
道已南乎甚感甚盛益滄來餘喘苟活草間俯仰愧
忤已無可言而一邊齟齬愈往愈新其說甚長非不
欲露出嘗者肺肝聲言廝殺而當此衰季攻我朋友
亦自難得其多少言諭往往有警發人處是致羈縻
因循未克兩段到今思量則省翁之愛我甚厚而我
之負省翁多矣悟往追來庶或愈於始終迷復則不
敢自隱敢以說及倘或俯諒申老人杖策遠存者年

風力在古無二而只賤子之空踈伎倆欺人至此者
罪不容逃矣

答尹雲瑞

甲辰四月十一日

沈友書辭言之滾滾完備周全政如明鏡高懸妍醜
自見密網匝澤纖鱗莫脫雖喙長三尺何所發明蓋
鄙文中曰主氣之學曰曰湖曰洛八字既犯不韙之
科矣雖非人言自知有當勸之律久矣今乃如是者
可謂不死之人心而常存之天理也夫以陋拙不能
備數之員得一場討罪於大方家規模範圍之中者
榮幸多矣固不敢以毫髮自是之意者在肚裏所不

然者天當厭焉且以諸士友言之何嘗有愛憎於吾
輩而樂為是也實以尊賢衛道之地亦不可全然無
事則多少紛紜非只為程氏發也又何傷焉兄答副
本倉卒涉獵雖不致詳辭旨委曲婉轉無可改評至
若為華翁立幟者則又極磊落詳明可當書紳甚感
甚感

答尹雲瑞

甲辰七月六日

二度手命洎擬疏通草並時入眼壹鬱煩悶之餘多
少爽豁殆若執熱者之濯清風也近日雨暘調均晚
稼甚幸第坊湯麥飯膳於紙墨雖甚清淡病胃衰腸

决非十分可安者矧篤老地自家榆境如吾兄所
值者未始不令人茫怩也時毛虛實真假縱未能詳
盖作契券捧價文舉一國土地而信手賣買者自有
其人而紳士之外面塗抹強聒奔走政如呼臯屬耳
乃從啓手足之列追美其用藥當否者何嗟及矣皇
帝說話亦是賤子之妄有干犯而迄今不承究竟者
為今之計似只得藏弄巾行以待外史氏折衷未為
不可至若封章一款坐而指揮尚可云爾曷容扶曳
老人強其不能如諸少年論議耶此漢之好事釣名
時人之指目久矣雖欲開咏誰肯聽信而有補柢剝

床之災耶神不守宅未克詳稟

與尹雲瑞乙巳十一月六日

自聞近竒精神恍惚如此乎如彼乎妄以不容已之
下計曾因張君行使之仰達尊聽為之可否竊計已
獲照管矣茲拜惠翰有以見先得我心之所同然矣
而深知做時不如說時人心不如我心每有事未發
而受寶禍之端謂之奈何且夫事之利病姑舍各其
忘身忘家出門周旋然後事而愚與執事方在病中
進退不能之地又將如何穀菴云云未可準信若然
則曷可漠然若吾二人者耶可訝可訝近以此事來

問者略有之而學之不講不敢率爾應副只以我則委質仕籍斷未可偃然在家設有道路押逐如已往之端而又或有劫之以兵之舉在所不辭之意泛然應之而已內浦議論闢甚踴躍小小間是非置之忘域久矣將恐將懼靡所止泊之地焉有以紙上偶爾筆端介懷者耶如有從長發慮向前奮發至死不變之氣勢則斷欲趨走下風用伸壹鬱之衷計矣

與尹雲瑞

丙午閏月一日

向於鴻山旅次逢宋李二友槩以南下之意使之轉稟想已俯燭自是以後為蹤跡詭秘居處壹鬱舊崇

新症轉輾加添幾殊者數而于今六十餘日尚求悵健係是自取謂之奈何所營人情之落落難合到處一般且夫各會伺察轉身不得晨宵畏約不啻冰淵則事之湊合未必其究竟如何而似不為全然無動靜耳此去崔哀無文好義其心可想憑聞貴邊有傾耳好消息專次進去聊勸迂路暫候門屏幸賜款顏密叩裏許大槩如何洪州事始聞垂翅終能有奮翼之望否

答金景尹

樂道○甲午三月

卽茲春暮伏惟尊體動止萬衛令胤既講冠儀又賦

車臺老兄可謂能事畢矣區區不賀之賀難容于心
弟喪威餘悸重嬰沴感擁衾度日良覺可憐別紙申
申橫豎汪洋難可領要真予不得已之滾滾筆力也
自得書以來或日者一行或者數行至今爲三朔日
予而尚未卒業甚矣昏滯也蓋此漢之默默亦爲吾
兄之沓沓而試可提警俾不或至餽以不言而同於
穿齋者意甚摯矣事亦勤矣然見今累年之獄決案
已成首魁脅從當有定律非人力所可推移言之未
必有益不言何嘗有損只宜拱手俟命而來教云云
正欲其挑發事機趁速結末則抑鼓關擊鼓自鳴寃

枉耶亦將發文布告同其憤惋而望其得力於竿頭
之地耶旣不能然則此漢之仰人臭息衰如死耳固
宜長在於朋友不信之中而吾兄先事之見亦恐其
發之遲緩也愚與省翁論文五十年雖未能始終周
旋同其麗澤其縝密德量蘊藉家風殆願學未能而
悅服者久矣且以先師知人之明亦嘗有真我師無
對手之稱至若重翁之磊落有或短省翁於其前者
則每每有如割肌膚之教是其兩先生重愛期待之
意豈苟然而已哉實以斯文之重非人人所可擬議
也為省翁地苟能一心如水不貳不改則太平萬世

庶其在茲夫何垂死之年變幻情節始謂先師疾病時自家稟質之未見察納爲千古未了之恨而至言更張本意則又引朱子退溪臨終前改誠意章格致說已例有若先師意向恒有未信付託自在不得不已之意及其衆論如火不可安靜則變之爲調補文字其意繁謂先師全集中說心去處都是過當偏重不可爲典要惟此四五條件在下位正名爲差勝云爾迨其臨絕乃用朱宋夫子易箒時傳授直字之訣並與差勝者而付之八人則又豈不以正案文字終是苟艱都不若師說還他師說已說還他已說而不

欲關涉者乎以其著於往復則其說多歧不可枚舉而蓋曰先師說心原與聖經賢傳不同曰不欲苟同先儒以言其自任之重則曰此心至公此理至直知之罪之恭俟後世則是其隨地抑揚移步換形殆生龍活虎變化底手段决非出入口耳執一不通者所可涯涘其萬一也然妄竊以爲先師心訓集羣儒而大成正一世主氣之顛倒破陸王本心之猖狂通明灑落公正平坦雖使程朱在座栗尤更起亦當莞爾符合庶無異同則凡言議之出乎此者殆同誣大禹以湮洪水毀孟子以言性惡安所辭其攻斥乎特以

事在一門義同兄弟而不能無哀痛迫切之情也怒之則只得曰失言也妄發也廊柱之再數也三思之反感也責之則亦可曰自私已見不滿先師而以夫子之道反害夫子也言雖不武意實自足過此以往探本窮源充類至義百般吹覓索性攻討驅納於擡頭不起之萬文坑塹則非只見識力量之所不及亦人情事理之所不忍也以人情事理之所不忍而強顏苟訾雖至愚下賤尚或恥之况稱以幾十年故舊而今於既骨之地重起事端曰否曰臧張皇不已則其道理得失尤當如何欲其餉洪量君子之稱而遲

疑等待坐觀動靜云者不亦以利害邊人而待我者乎此則置之且以魚兔上重翁二度長書見之以重翁平生為不辨人歟功虧一簣之學問斤洋疏廳為汙雜之場而餘外網打剗埋之手勢筆鋒無毫末近似於衛師衛道存心養性之實地直一間巷常賤輩呵佛罵祖盟狗詛馬之口氣也夫以重翁之道德亦為省翁數十年服事之地而蔑視凌踏至於如此亦見其狂妄不足較矣至若貴人以不訟其冤處於疑信之間者不亦淺之待龍溪乎久廢筆硯殊不成說幸賜照諒如有未當即行斤正千萬企望

答南宮聖益

雜○丁酉七月二十三日

心說一款須是有先師道德力量然後可以議及苟無此本領而徒憑頰舌互相長短而已則雖說得無差天花亂墜何補於事只得如和靖緊守不為衆論搖奪庶其為寡過之道也蓋當此之日苟全性命俯仰慙憤求死不得奈何只死一字亦不容易當死不

死則謂之失身不當死而死則謂之無義此當講究不可緩者而離羣索居無誰可語幸入思見教如何

答洪思伯

在龜○甲戌四月

蘄山場居相別後仍為貽阻且於昨春鄙門適有不忍言底喪癯孳不忍見之孤兒間關溪峽至未及兄居二十里地則竊欲緩得一日晉請起居而此時行色方在畏約且帶累別人是懼竟未能為既而得罪朝廷投荒禦魅則萬緣都消惟先師門下之曾同進退者及其餘臭味之相應者自不禁勞心忉忉也匪意去臘惠書問及死生兼以獎借期勉迥出尋常字字句句榮於華衮三復以還殆紙毛而無斃自念醜劣何以得此但聞君子言不苟發若以此等義諦或者施之於依稀彷彿世所歸望者則猶之可也今乃一體說去於負薪力田不及小學童子之一蠢蠢野

岷而曰如斯云爾則不幾於小斟酌而大不著題者乎然益之受善切不欲以時議俗論有所參錯雷同兩是而雙非則自茲以往勿以為不足教而終教之千萬祈祝耳

與洪思伯 壬午

令從氏喪事無言其事功樹立之如許念到情地行道之人猶堪隕涕况處在朋友之列而義關好惡者其痛悼寃切豈有量哉所存於心者迨靈筵之未撤謁蹶匍匐以伸一哭兼承緒論之萬一因循至此愧悚何可言即此秋高侍餘尊體何似伏惟喪亂餘懷

應不以歲月之差遠有所弛損耳目所擊決難作廣胖氣象為之獻慮何已重菴丈衰老之境重作萬里行役雖其精力所積夷險一致功在斯文極其無憾而其於吾黨情私則自不罷一日而安於在席况於高明又萬萬別焉者乎側聞尊駕間作省問而向後消息漠未聞知益切憂戀時事倒懸不可預卜其賜環遲速而天地鬼神質在上下安知早晚無大需之期耶益親齋類復無暇抽身且自家兄捐背後百憂絆繫不能作戶外人事只自可憐耳

答柳聖存

基一〇 中戊三月

已逞無安雖屬運氣苟求其故實由此漢真所云孽
自己作空汚良善自反愧赧莫省攸措而至其越海
囚棘資益無地則尤不勝憧憧也乃於家中書幅惠
翰伴之擊讀屢回其所神奇殆同自天而降來也况
復縷縷勉戒極知湔劣不敢承當而其開陳迷塗期
欲同歸善地之盛意則何能少忽于心也春節已盡
伏詢大庭氣候履序康寧侍餘棣體連衛萬護弟自
千重罪外他榮悴只可置之度外而七耄侍情自不
能放懷耳

與柳聖存 丙子三月

舉辭厚禮乞憐犬羊以圖目前是廟堂之活法知義
理之必當為必可恃而向前做去不計利鈍是腐儒
之死計二者真水火之不相濟薰蕕之不同性而今
乃強欲合而一之宜其無分效而挑實禍也吾輩強
聒無乃太愚太踈計乎累第罪戾所積意謂南海之
神亦當罰而殛之及其登艤風叔浪息極其利涉又
於定頓之初山形石勢冥黑危險不堪居接漸次慣
熟黑者白險者易依然是海上好山川時望內地境
界反為黑漆貌樣豈性固喪矣目亦失其職而然耶
且夫朝家所以遷于此者抑亦以親近忠臣之側觀

感悔悟前其羞惡之端然後或可甄叙計矣而斷然
一心亦不敢自變真可謂化外之氓吾兄見之亦當
一笑也

答柳聖存 丙子七月

疏事雖是已往正所謂做時不似說時人心不如我
心者也在吾兄英銳奮猛之氣無恠其事後如是而
當日卷舒進退之權既不在吾兄手中則又何有屑
屑追提者耶我無足愧於心而人無足病於我則斯
可浩然愚見則如此矣第某友平日風旨言論何如
而當場舉措糊亂顛錯致使重菴省齋兩丈苦心委

棄於草莽泥塗之中者為十分可恨然此猶餘事胡
不觀於一國師儒宗匠乎禮待地望人之瞻視及其
所以自處者決非吾輩閑散所可比倫而平生其身
不出則其言不出雖見邪教恣行異類衝突將有不
測之禍伏於冥冥之中而不以為意者豈不以至精
至密一箇不易之道理可以心傳而不可以言傳者
耶某友之無端立異似亦依倣此法門者而若以執
德不固為人所休貴之則當怒而不受也因兄提起
漫此及之非敢以評人長短覽即付丙西駕聞已返
稅逐鹿事得失何居豈非託名於此而欲遊覽風詠

寫出不平心之計耶草樹蒸炎想貽無限困惱也第
風土所拘志不學氣頽倒遺日且逢此旱荒千里家
室無以相恤心焉如焚不可止定耳

答柳聖存丁丑正月

兩書俱悉雅意但惟吾兄讀書數十年尚不熟七十
子服孔子之義而擔得此醜劣題目也然昔之叛卒
類皆怵禍徼福實為目下自全之計則其象顯著其
名不爽容有可言兄之今日既無此等計較商量則
人言哢哢正何足為加損也哉只當緘口不提往事
務積誠意期使彼此渙然克全舊契則豈不甚幸前

書示諭或者之說未詳謹論而如其嘗為而不可已
者則何必讓與別人而不量自反耶弟料外逢子新
舊歲况甚不寂寞今忽告歸殊切懷惡而課程廢頓
誠非小事望於誦愆之中不廢接引之責使新學小
生俾有遵守千萬仰祝

與柳聖存壬辰三月

玉屏壇享聞此克日將舉甚盛甚感向者拜晤時宜
有一事稟告俾入商量而顧以鹵莽踈略未及運意
發端今幸山木李友首倡其議可謂先獲我心而尤
見其好古尊賢之誠出尋常萬萬也蓋李先生以泉

門高第思翁宅相不尢聞達眷德林樊逮至末年望
寶動人道刻銓擬非只一再而牢守東崗始終不就
者無言其道德造詣淺深之如何只此一事亦足以
廉頑立懦樹百世之風聲矣而今其沒一百五十餘
年不有祭祀之典者誠士林之闕失也是則李友之
論可質之人神而無可改易幸垂察納若其遲速緩
急一以重事體協公論為主不至為急遽苟且反貽
譏笑之地似甚穩當未知如何

與柳聖存

庚子正月十一

前此大同人事闕略多矣自干罪過何望恕存居諸

奔流歲籥載新伏惟孝體支福烏川故事出於至性
世教所關誰敢間然而只五旬以上血氣向衰惡寒
大暑尤難為力不可但以木食水飲而保其全安如
少壯時節也幸隨地變通不止為劃一規模似亦正
當未知如何得無曰不能以禮處人也耶此呈胎紙
雖成陳曆既已作於心發於言形於紙墨者亦或流
傳關聽而未必無一番經眼之慮故不容隱諱幸一
晒領憑以為賤子視履攷祥之斷案亦一道也

別紙

前此一場廝殺彼此說話俱是帶氣中出來未知孰

為得失之如何而在高明觀之高明道義特立千萬
人可往此漢私意盤結分寸步無奈宜其置諸度外
不相上下而猶且含忍包容警戒鞭策而不但已高
明之愛我可謂至矣然不直則道不見與其隱忍含
糊苟冀無事而不可得曷若明大義而直之以待執
事者之可否也夫高明之前後罵我斥我無所不至
者豈不以不斥省翁如高明之口也又不以不尊高
明如高明之志也事事學高明言言學高明皆如高
明之願也但人心不同如面我之不能學高明猶高
明之不能學我豈可強哉夫省翁心說調補之論固

不免廊柱之誤起後學迷從之疑然此老一段苦心
炯炯若可見者惟是師說之或有偏重道理之或未
盡明而為之耳今若以此勘其罪則只當日過憂過
慮而已然其獨見之智不撓之勇則決知其非私意
執拗者之比况如高明所云背師誣師賣師之說者
豈一毫而可比擬至如重翁促壽之云者只管陷省
翁而不知陷重翁是則高明自謂依附重翁而實有
甚於背叛而攻斥之也且高明每以禁紂告墨陸鏗
待省翁而其自居則湯武之奉天討罪也孟子之鹿
拳大陽也朱宋之懲討不義也可見高明自任之重

甚令人敬服然省翁之爲桀紂爲告墨爲陸鑄今不
必分疏只是在高明數十年父事底道理恐不當如
是悞活無忌憚也高明之意嘗以爲華翁父師也省
翁兄師也兄而背父則寧負兄而不忍負父此義固
嚴矣然今固無背父之兄也設使有之弟之所以處
其兄者當有道理存焉爾豈可索性紆臂推納坑坎
惟恐其或出而下石不足則又鍛鍊罪惡搆捏虛無
緊緊縛住加以鐵網要使爲天下後世所不容之亂
賊巨魁而後已又奔走請助於大路街上知與不知
之人嗚呼其爲父之誠則雖至而獨不有餘地於其

兄乎萬一其兄之罪一毫不如其言則又將置其身
於何地耶且高明不聞朱子責劉淳叟之言乎劉本
陸之徒攻其短於朱子則朱子曰予靜得失自有公
議公安得如此又目之曰是不近人情又不聞鄭桐
溪處仁弘之事乎桐溪嘗師仁弘後見其惡而諫不
聽則絕之絕之而平生不言仁弘之惡由是觀之省
翁得失自有公議在高明道理只當舍冤忍痛不言
其過如桐溪之於仁弘可矣不當自爲不近人情之
劉淳叟明矣况省翁初無象山仁弘之罪者乎抑世
之爲湯武爲孟子朱子宋子者豈少一柳龍溪乎當

世無之則以俟後千百世亦可也何必自犯名義之誅而巧為辭說以示人勞攘捃摭之態也蓋高明之病嘗在一疑字疑則生忌忌則生猜猜則生恨惟此四病轉輾成痼遂至不可為之地而隨時隨處輒帶此病而出以至眼空千古口無完人殆如病風喪性之人而為一不可近不可遠之威施嗚呼高明其亦自知也否乎至於此漢分上不以愚陋淺弊無所知識欲其引而偕之道義之中此意已為可感而雖構誣播揚之中亦未嘗不以為貴善之道尤幸見友諛之敦然素性合下固滯無受善之量且已將此身付

與高明久矣操之縱之都不干涉又何足嗷嗷也病伏矻矻艱草以呈自知罪大坐俟報箭惟高明裁諒

答申聖淡

秋○丙子十月二十三日

客臘電別恍若夢境南海有緣再度華陰指點雲樹想像高肩未嘗不瞻望躑躅而起欲哭之心也八此後朴友袖傳寵命披展莊讀問慰篤摯且其詞旨滾滾發越慷慨有以見仁人君子忠厚惻怛悶時病俗之意溢於言外可見平日所養剛方正大類非拘見所可窺伺其萬一也居然夏秋盡而冬又深矣伏詢庭宇起居康福侍餘佔畢日就高明周旋師友之間

講貫疑難消融百邪其樂又當如何恨不得親近懿
文少遂夙願耳第此年事甚荒水菽之節想多憾然
獻慮何已累人餘愆未勘重入惡地雨露霜雪無非
聖渥而只老親情事自難為懷且兒輩教養失時將
不知作何等人重可悶也

與申聖淡 己亥九月三日

鄉井舊契師門同列無生則已有生以前曷可忘諸
而參差世故因以反復聲微阻隔殆三十年矣雖嶺
海奔竄貧困汨沒之中其所憧憧實非虛語也即因
風便憑伏悉伊來靜體起居雖沒大愆諸般調過便

屬竿頭天之厄善類何若是其夢夢也若要熟也須
從這裏過者固吾儕平生佩符而此乃少壯時說話
其至年迫衰境轉動不得如執事者將以何等語奉
慰益切况歎而已益老而疲軟愈甚目擊數十年許
多變亂而苟全頑命於公於私頓沒錯落自家之一
倍兢凜固不可言傷人之具眼目識時義者將謂斯
何亦想執事視同已闕意其有多少規責而惜其德
音中途淹滯未及入眼耳竹軒與金上舍分外在存
古人風力不意親見而只本地空踈不克上下論議
者大故悚仄兒子有南遷之計事若成焉則未死之

前當一握叙懷預切企望耳

答申聖淡

辛丑六月十六日

一登門屏雖適我願歸來穎結久而未已蓋是人情天理之不得不然處想吾兄亦同此懷也茲拜珍緘謹審雅履樂天任分安之若命大度均寧仰庸慰荷上帝疾威大運近止以人事言之則殆亦晚矣復誰怨尤益家禍闖作從弟之少我四歲者無他證而奄爾傾逝卒襄已過萬事邃古客鄉蹤跡尤極痛惻奈何奈何竹軒老人炎程冒役已是妄舉而其中一事尤極無謂恨不商量於先事之初也

答申聖淡

乙巳十月十日

趙生帶書而至審前此御者利涉體字鄭重慰滿何言僕爲初寒所困叫苦度日良覺悶然本俸日前見顧謂有邑幹不得留連影本奉持而去諒其事樣斷非斯速竣功則只可任其所爲冠擇待兒子一番入京得備若干需用後可定日若然則趁其時當專次告期至若付託文字畱待少健早晚何關

答洪範五

備○丙子十月

衆中霎晤依若夢境茲蒙兩度情翰前後入眼人勤我懶雖不暇訟恤因辱眷何敢忘也教時事一日結

好則其餘曲折乃次第事也然天理恒存而人心不
死又安知吾君不赫然斯變掃盪凶穢光于祖
宗乎第未必其保有是舉則來諭所謂反躬自修共
守帝衷雖先輩復起不易斯言矣謹詢冬令侍養萬
重玩繹有相纍漢惕息鬼窟其狀可觀所悶親候久
隔不能自定餘祝加畜

答洪範五

示諭縷縷反覆上下有以見憂世之深求道之切字
字句句無非實見得是非中出來恨不能翼如前晉
叅承緒論耳此漢料外得蒙再造以喜顏歸對老親

家室並無恙苟究其極天地罔極粉骨碎身固不足
報其萬一而第今親年奄迫餘養無多且以不肖之
空言專事強聒雖在婦孺並知其不可則愚雖無主
見曷容撓奪於人口之低仰耶可言而默固是為人
臣者之罪可默而言亦近於穿窬自是以往清陰之
鶴駕山桐溪之德裕山願學焉而此亦不容易奈何
奈何所欲擇里展接以資見識實如示意而其於必
不成亦何狀

答姜景夏

健善○丙子十月

曩承寵訊遠及絕洋反覆津津可敵百朋地僻便左

未克修謝曷勝悚慙居爾冬深伏詢茲辰侍餘學候
萬重竊聞高明負絃異之資加篤寶之工早寤及真
不為毀譽利病所動古所謂一變至道政實際語也
尋常歎服欲叅聽緒餘而不可得耳累漢少壯不力
及于今日雖悔而無追補之望復有何可道者耶

答姜伯三

復善○丙子十月

獄門暫晤雖副夙願驛亭相違極庸悵恨夫因無狀
之漢而致諸君子無限困頓者豈細故也哉蓋禮教
不可暫去而鳥獸不可同羣則今日事苟有毫分彙
性自不敢依違亦是輿僮下賤所共切齒也來教所

云亦邪扶正恐題目太重決非賤漢所堪當也伏惟
近日侍體何似三餘工程想必愷愷遠用湖禱累漢
離親孤囚雖云未樂萬事自天豈容安排作為於其
間哉便忙未究統希照亮

答曹衡七

垣淳○壬寅七月十三日

參商涯角識荆未易迺者天誘迷東得以周旋乎先
生考槃之地衣履之藏而獲遂其高山景行底萬一
情事者雖謂之不虛生此世可也矧乎脚下承述發
揮闡繹如執事者更有幾人一宿飲德警發多矣只
浪迹無定未克蘊藉者為可欠耳荐承賢胤左顧珍

函入眼其所獎借殊不稱情令人汗駢罔知攸謝而
眷眷至意何可忘也

勉菴先生文集卷之九

勉菴先生文集卷之十目錄

書

答趙中五 斗煥

答李元禹 錫英

與俞景善 致慶

答閔亨甫 承泰

答趙友三 鍾益○三

答趙景習 啓學

答邊德一 錫玄

答文景雲 載興

答俞景章 致靈

答金聖寶 河璿

答金伯顯 鍾世

答趙幼平 秉準

答盧德瘠

答柳聖一 基洙 ○ 三

答李華瑞 相學 允佑 相和

答廉敬儒 在莒

答廉敬甫 洙學

答安處中 極

答文曰瑞 章煥

答朴大圭 奎鎮

答柳子中 道均 ○ 二

答文永煥 桂洪

答金瓚振 相翼

答梁汝正 在慶

答朴學中 麟鎮

答李寬汝 承愚

答李王見 現圭

答金京老 榮九

答梁文五至煥

答金子暉真敬

答文勉之台煥

答洪允溪承源

答洪士拯承煥

答崔淳若濟立

答閔成夫致教

答鄭胤祚鴻錫

與金仁仲春善〇二

答李公信相珪

答宋原明哲憲〇二

答吳汝敏聖秀

答文奉卿圭政

答權君五載奎〇二

答文士鏡圭性

答慎景軾宗麟

答閔景構肯鎬

答孫文叔永烈

答孫子翼永謨

答奇穉學教行

答權子德 戰米

答權應韶 鳳鉞〇二

答魏致明 赫基

答魏雲汝 啓龍

答趙聖寬 鍾極

答趙誠立 鍾應

答閔景朝 解植

答禹道瑞 恭榮

答元文三 禮鎮

答魏大彥 琫植

答金武卿 漢文

答朴允常 恭亨

答余永魯 律相

答余孟緝 敬燁

答李應和 圭在

答李安普 憲洙

答鄭說和

答李原禮 鉉五

答曹應元 在奕

答卞仲剛 鎔〇二

與林伯崇 頤榮

勉菴先生文集卷之十目錄

勉菴先生文集卷之十

書

答趙中五 斗煥○丁酉八月二十四日

疇昔辱臨巧值出門未奉清誨徒聞座香瞻悵當如何茲於匪意獲承崇翰開緘擊讀尺蔡拱壁不足以喻其感至若頭辭之禮際過重獎借失宜有若見處以古人界地者誠不勝背汗顏辭却顧反走也八山結茅隨分講讀是朱先生滄州故事也當茲世界安身立命又嘗有進於此者乎西望引領不任健羨益鉉當 主辱臣死之日苟全軀命令人可恥前此說

得假饒彷彿只一時之見猩鴟之言耳有何可取幸
除却邊幅時惠警責則豈不爲由已及人之一大事
切也耶予萬千萬萬閱君暫叙旋別未盡底蘊而要之
斷斷無偽之好姿稟也爲之不已前頭詎可量耶只
主人空踈不能副其遠訪至意者爲可愧耳

答李元禹

錫英○戊戌七月二十二日

賢胤左顧今至再矣其意非不珍重而無限好師友
立立於黃卷中有不朶朶則斯得之矣且其姿稟淳
正見辭精詳由是以往前頭成就詎可量耶幸因其
過庭申申以不出門而立家計無徒往來屑屑而或

取道路間无妄之困恐爲今日小貞之吉也未知如
何

與俞景善

致慶○戊戌三月七日

益鉉老而冥頑喪亂以來隱忍苟活不能效臣死之
義重以不獲於朋友信筆呵罵之情外題目殆不容
抗顏對人蟄伏訟愆肆於座下草土之厄奔波之境
尺紙人事容易蹉過茫然若不知者回戀疇昔忸怩
實多即日御者言旋上堂問起居棣床供湛樂積違
之餘其慰可想而只入于其宮伉儷之儀琴瑟之御
徒憑依稀而已則雖丈夫氣象斷不可泰然不動心

而興喟未知何以寬抑然天下事完全者無幾座下
既以草茅匹夫扶天下大義洋洋聲聞動盪華夷而
使百萬生靈免得被髮左衽之禍者夫豈以尋常事
功論者哉成敗利鈍不須言也聞其始終日記該備
周全可公傳誦道而不容作一家文字者亦今日之
一部陽秋也忝在同志之列豈容無一番奉覽之心
哉幸一示之千萬穀菴行止事勢似然而未死之前
一面無階徒切悽黯耳

答閔亨甫

承泰○乙巳八月六日

蹇拙伎倆報蔑消埃墮損國威薄乎云爾烏得無罪

茲蒙執事曲垂軫眷惠以德音三復莊誦幾乎紙毛
而至其獎借擬倫之太欠攔停則適足為君子一言
之累也汗顏何可言拜審近者尊體動止候一味康
寧種黍養鷄教子課孫老境滋况莫以尚之徒切健
羨之至臨遞略伸衷曲

答趙友三

鍾益○丁酉六月一日

省翁遺集鏗役以若僉君子綿力何能如是其神速
也政所謂精神一到何事不成者也繼自今苟能人
人講服家家誦傳與華重兩先生文字相為表裏則
彼雖百千西鬼將不得蠖螻於白日之下矣其在後

死者責任豈不是偉然事業耶靜老之休菴退翁之
月川不獨專美甚感甚盛

答趙友三 丁酉八月二十六日

蒙惠書責以不絕龍溪夫師生大倫與君臣父子同
為一體苟或有戕之者是自棄其生誠不容於天地
之間凡人之知生三之義者孰不欲亟絕而斥遠之
也然其間不能無商量者省齋龍溪與吾皆華西之
門而龍溪以所事事省齋者也今省齋一朝為更張
師旨之論而未能厭眾心則龍溪之捨省齋而為華
翁乃道理之當然也然其醜詆誣辱之無所不至是

乃所以為得罪于綱常耳若自華門視之又些有輕
重不可一以棄絕為義也故以重翁之精義亦未嘗
遽斷以大義况今世變日加吾黨日孤其知能尊華
翁能斥洋學能誓死不斷髮毀服如渠者又誰哉此
尤不忍以墻闕之故棄外禦之助也若如高明所處
則孰以為不可也乎來教又引鄙與省齋書及祭重
翁文以為致士友之疑夫省齋吾四十年道義之交
也彼此有不滿不容不相講歸正此友道也雖其辭
氣抑揚之間設或有不稱停處皆已道破生前兩相
無嫌何足為後生致疑之資至於吊祭之不能特因

道阻而便稀祭重翁文中某某等句初非指省齋之語又安得以此相詰乎大抵今之責愚陋者有二端一則曰省齋更張師說之論十分正當安敢有貳論乎此則高明一隊之論而雖死有不敢從者矣一則曰省齋分明是背師害師賣師之人安敢不斥絕乎此則龍溪一隊之論而雖死亦有不敢從者矣蓋省齋晚年不幸有廊柱之誤而原其心則出於尊師衛師之至公血誠所謂觀過知仁者而惟其正案出與叔之間使人不能無些疑夫豈有一毫背之害之賣之之意哉是直與誣伯夷爲貪謂孟子言性惡者同

一心術誠不足較矣蓋由是二者而觀之愚當爲知省翁者乎罪省翁者乎愛之者乎斥之者乎愚之始終執見不過如此又何有定論不定論改見不改見乎士友之疑之者於我何哉若以親柳故疑之云則所謂親者道義相磨學問相資切切惻惻之謂也非問死生叙寒暄不絕蹤跡之謂也然則吾與龍溪雖日復源源於士友何干哉高明乃以此爲壞天下綱常天倫又以為斯道亾滅不待夷戢而蕩然願高明更加謹慎之功也又蒙教繩墨規矩四字不覺愧悚愚本無田地工程今已老頽雖欲用意不可強也又

不宜為粧撰矯飾之態恐終以弊習死也蓋如愚者
已不足言惟近世學者類多虛名無實但知尊已而
不知尊人但務自是而不務自反長傲遂非眼空一
世是大患也切乞隨處省察勿以不謹嚴而忽之則
幸也即惟比來經履萬裕益鉉斲斲如昨無可奉道
四妙俱佳但無以相助甚愧穀菴東還杳然深用慨
歎寄惠詩章推許過重令人不堪承當幸即檢改如
何不宣

答趙友三

戊戌三月七日

愛而不見寶勞我思尺幅入眼亦對面之亞也傾欣

何量謹審春寒經體啓處神休愷悌存養尋數日有
事在省翁勸導後學之苦心可謂不墜於地也欽服
欽服俯教纏纏苟非厚我期欲納於無過之地者斷
不能若是懇摯而愚之所存略見前書不容更煩豈
座下或慮我以内實顧戀不能忘情而外牽朋友物
議姑為是周遮飾辭而然者耶悛刀兩段在座下處
義無恠其然在我事面決非勉強可能亦非外人可
以勸沮為進退者政來諭語謂執德各異者諸士友
之未克深信吾亦將如之何哉

答趙景習

啓學○丁酉八月二十五日

今日意中人僅若晨星而亦且參商難合心舍耿耿
何時可已即拜手命謹審秋令啓慶珍重招友講習
樂意津津感荷之餘慰瀉沒量鄙人本來殘質重以
脚崇磨以歲月志業一無所就居然作七旬棄物究
竟事業只有夕死一事何足言乃蒙座下不以鄙夷
話出心內綢繆委曲意圓語足雖家人弟兄間情誼
蔑以過此反覆愛玩尤以見篤於自治厚於朋友出
尋常萬萬至其好不知惡喚鐵謂金指黑為白過相
吹噓而有欠稱停則殊非所望於座下也紙末所教
可見向上之匪懈欽敬庸有既乎第愧詢莠之地頓

無一副得力可助其下風奈何竊聞之此事屈伸反
覆只在一念間非若醫方湯劑之或廣濟局也故曰
仁遠乎哉我欲仁斯仁至矣惟座下加之意而已况
又工程有素無待外人提撕者耶

答邊德一

錫玄○戊戌三月七日

多少示諭迫此榆境得聞攻闕實所願言好語獎撰
決非所望於座下也省翁集大役以竣遠近拭目苟
非座下尊賢憂世之心出尋常萬萬何以及此甚感
甚感自茲以往惟讀其書求其義使平日心法學術
不墜於地者政是座下諸賢一重擔負雖欲辭之不

可得也未知如何記末年至益衰真一無庸物事自
憐而已

答文景雲

載興○己亥正月十一日

頃者逢迎雖屬凌遽言念厚眷曷可忘諸居然獻發
實勞我心手命入眼欣倒罔量矧又際茲靜養動靜
一例珍重者乎僕憂患之餘只麼神魄漂蕩殆盡擡
頭不起只自悶憐先塋石役有此經紀德門追遠之
誠有可以挽回倒俗而警時人之耳目也瓊什意想
甚好而只其補獎老朽者太不著題令人赧然耳

答俞景章

致憲○丁酉六月一日

辱垂先施已極感悚而禮際之隆辭命之重雖古名
儒碩德得此不得不兢凜瑟縮座下於是乎過矣不
見其人不聽其言不考其行徒據一時吹噓之口不
察親愛之辟而深許之此自古昔識者之所深病也
何也以其君子雖急於取友而賢否不可不擇好善
雖曰優於天下而知人觀人亦非易事也僕自省事
未嘗不值賢師友好機會而心不能大志不能立貧
病所迫祿養是急而汨沒於利欲科臼者數十年矣
重以瘴海餘喘百疾纏身神魄都喪今年將七十若
干見聞如畫脂鏤冰外有的然之聲聞而內則無實

以繼之噫是豈始初作為之本意而父師之期望者乎倘座下一日相接親見其然則當慙惻不暇而追悔其眼不識人也書出有日謹詢晨昏唱喏神休體悌同被至情隔以千里侍養諸節不能無寢食靡甘之慮令人貢悶八路義舉中唯毅翁是時顛沛至此雖極可恨當此大變幻安之遼東安知非亦一活計也耶斷髮事邪說更熾未知末梢之復如何而一邊商量則出脚八仕者外其餘人民似無橫削之端矣俯教二說俱是理到之言不敢畫一可否而要之死亦不可容易豈以我之所不能容易者大言於未然之前也省老文集竣事至此為師盡職非諸公而誰也欽仰未已

答金聖寶

河璣○甲辰七月十一日

南下以后去北愈遠緬仰德懿漠然若天門闕苑可望而不可親臨風引領只切悽黯兒還獲拜珍緘審御者方留京邸體節萬重前此履歷簡自聖心再試民社竊惟感激洪恩消埃報答自有欲已而不能已者况茲艱危孔劇主辱臣死之日名在仕籍進退遲速又不容以些少私情容易前却則其所憂悶斷非昇平無事之比為之貢慮未已鄙人老境去

國揆以事體豈是安於心者而年老聽子自任不得
轉輾至此國有緩急未克奔問苟全頑喘覩然沒恥
者良覺可哀饋二物老農家計侈濫太甚言念眷意
雖不敢還冒廉極矣

答金伯顯

鍾世○巳亥八月

三綱文字雖未奉繹有以悉執事家學源遠流長篤
於名義者如此後之人其勿以錄規錄以心傳心憑
藉效則不至爲言譌文字之歸則庶不負先輩重倫
理警頹俗之苦心血懇而亦足以藉手見先聖先王
於地下綽有餘辭矣其爲功曷可量哉若其卷尾託

名誠求之而不得者萬有多少筆力或可彷彿固不
敢讓與別人而奈見識淺短義諦僉踈何只詢莠之
下不敢專事飾讓猥構數行蕪辭奉塵懿文之地幸
勿以成文視之深加刪潤俛况大何千萬幸甚

答趙幼平

秉準○丙申五月二十日

愚與尊先師雲菴先生嘗有同門之舊兩千里睽違
殆三十年所矣每切懷仰奄隔幽明迨此舉國腥羶
斯道晦塞之日感古傷今作如何懷耶從茲以往區
區所望惟在門下諸賢之聲氣相接而已古道之書
忽出於金友袖中風義之篤厚辭氣之正直不問可

知為先生弟子而座下讀書之力又不可誣也幸望
掃除浮誇務積誠實期有成已成物之效如何為天
下痛哭為吾道流涕政今日志士之同情奉讀數回
何辭仰慰古人云皓天不復憂无疆也弟子勉學天
不忌也千秋必反古之常也惟願益讀經傳益務德
業上不負先師教導之意下以答知舊切憊之望如
何如何雖無一面唯座下庶可以此言聞故猥茲仰
煩或不以狂妄而誅之歟金友三載重逢其喜可掬
而歸期忙迫不能做幾日穩討為可恨耳餘俟早晚
奉晤

答盧德濟

僕曾在老先生門下一再承顏於尊先師雲菴先生
時屬蒙孩雖没向方薰染德懿若有感發者歷歷如
昨日而忽為五十餘年光陰杜門衰病痛世道之日
非慨先輩之益遠未始不西望太息不意月前獲拜
二月十七日所出珍函噫屋上之烏尚可愛焉况其
及門諸子之賢而道義風旨有見於文字言語之表
者乎三復感歎不知作何樣語奉塞其厚眷之萬一
也顧今天運孔否人物彫然斯道之傳幾乎墜地當
此之時晦養林樊庸扶殘陽以為異日興復之本者

座下雖欲辭之而不可得矣至於遣辭之際浮實吹
噓大不著題得無近於一言之不知也耶幸須增闡
心靈勉修德業以光吾黨千萬千萬僕老矣無以助
下風也

答柳聖一 基洙○庚辰十二月二十日

示父沒祖在為祖母承重一款愚於淺近節目常患
茫昧况其他哉第以先輩祖不厭孫之論推之則高
明之見已先得之矣無庸更贅先文遺事奉讀三回
歛衽起敬他人猶然况在孝子慈孫繼述之地其欲
發揮引重垂久而傳無疆者其心豈有量哉至若
以愚之無似使之措筆於其間得非不擇人之甚耶
姑且留諸几案以待與高明對陳其空空之鄙忱而
聽可否之命耳

答柳聖一 丁亥二月一日

賢季左顧兼奉尊函始悉大小喪變若是詎意種德
之門乃有如許非常之禍耶驚愕不可言從審近令
萱闈寢膳康寧侍餘服體一例珍重是可慰豁時事
言之痛哭雖在廢蟄豈無彙東之同然惟看字補愆
不失舊步是乃塵刹之報而躬幹契活無暇展眉還
覺愧恨耳先丈文字盛意不敢終孤忘醜構呈而自

來屬辭拙澁不成頭緒且夫積廢之餘函莽益甚字
句間病敗不少垂覽後幸一一指教不至貽累先德
之地如何

答柳聖一 甲午十二月十四日

坐在豺狼要衝歆艷貴境依然若玄圃閬苑只切流
注想而已即茲令季左屈珍函出袖盥讀娓娓多少
慰瀉不啻以萬金博也拜審日來侍養佔畢依昔乾
惕賢胤課程日征月邁紹述家學恢有餘地區區健
誦不容名言益喪禍餘悸尚在圍園時事板蕩寧欲
熻然只切苟活之恥而已矧偽爵一款言之昌披尤

極包羞來諭云云真是德我愛我之論矣而或有貴
之以千萬情外則誠不滿一笑耳長潭唁行朋友間
議論或並與其吊問而廢之以示顯斥之義者甚多
而以吾道理亦不可以人言左右爲展縮耳舜命小
成亦在唾罵中甚矣行路之難也

答李華瑞 相學允佑 相和 ○辛丑五月二日

不佞竇空踈一野人耳猥蒙尊慈俯賜存問十分感
載不容云言至若命之以不堪任之役則非只賤分
之大家難安竊恐傍觀有以議執事之忽於闡先而
擇非其人也是豈非无妄之過舉也耶感意有難終

孤塗乙副呈反覆上下則可見其實情畢露非出飭讓幸更改圖無或襲用千萬千萬筭以僕之行止無定致使來友留連數月尤極不安適擾寒暄二字姑置之只祝因序加重

答廉敬儒

在葉○丙申十月二十四日

華宗叩扉珍函入眼慰倒何量擎玩再三尤以見宵中浩然前定不疚底安閑氣象甚盛益姓名三字又為恠鬼輩毀美偽職也逮囚也困辱極矣而疲軟苟且不得辨臣死之義者令人可慙不足云爾先蹟奉玩以來感發多矣且夫七十年一隅墻壁亦爾開蒙

不覺沉病之祛體也第常享祝辭既欲少變則當視其人地手法以為永久之計事體宜然而誤及空踈則無乃惶忸之甚者乎還訝高明之偶失照管也

答廉敬甫

泐學○丁酉六月二十八日

猥蒙不棄被以德音感刻不容言昔胡文定公作春秋傳以進曰天理日消人欲日長而夷狄亂華撥亂反正之書可以行矣尤翁引而序之於清陰年譜其義可知也近來事消者不已而至於亾長者不已而至於極竟也夷狄降而為禽獸則高明今日之所致意用力者豈非有感於天運人事之無時可復而用

為扶持一線之命脉也耶恨不得叅承緒餘也

答安處中

極○癸巳九月十七日

禮笏蒙此副本竊觀其條理井井損益得宜舉而措之可行無弊當此閉塞之會尤見其為功萬萬甚善甚善教小序無言工拙豈敢推諉而適值忽遽未克下手姑俟數月內轉便如何刻字云云極知盛意之不邀而只以賤劣蹤跡塵穢好樣江山大涉未安恐不若拈得通天下公共道理邊好箇字若洛敬閩直四字或周幾張豫程一朱直八字擇於二者大書直刻而傳示久遠則庶幾事體鄭重道理完具決非小

小作為可比擬也幸須深諒

答文曰瑞

章煥○乙巳五月十日

山川脩復問聞之阻動經數載臨風引領只切人選之歎即茲料表手命落案謹審間來尊體動止神休珍岌大度依昔紆糾遠忱差可慰豁益柔海殘生尚多未勤旅瑣數朔竟為豺狼輩所驅逐于東于西貽辱萬端老而不死其效有如此者孽是自作尚誰怨尤承茲慰寬旋切悚感

答朴大圭

奎鎮○戊戌二月二十六日

杳杳天涯臨風長吁即茲惠函忽墜備悉間來履用

動靜一例休適鑽研尋數自有事在只此一段政今日安身立命之切近路徑患在立志之不篤用工之不專望須千萬努力若其就正辨惑又有松沙日新兩翁在焉豈非難再之機會也耶時事見聞言之疾首只當置之度外勿使亂吾腦次亦一道也僕依昨碌碌無可言者惟冀力學

答柳子中道地○辛卯

謹詢秋節侍學珍勝近來工程方在何書見今天地閉塞日月剝食禮義大邦百萬性命一體有溺於西洋波瀾而莫之救矣吾黨之一分可恃為生道者惟

讀書講義不負上帝付畀之秉父師傳授之訣乃是目前急務而類皆貧病居先皆災從之莫遂其志者多矣噫亦無乃氣數所關也歟望左右百尺竿頭勉進一步益讀其所已讀益講其所未講積久充溢不為外物欣戚所移動則庶見其安身立命自有餘地不待外求而得之矣遠地存問無物可報安陳芻蕘未知盛意以為如何伊外彼此平安字姑置之惟祝加愛進德

答柳子中 庚子十一月七日

神精日耗遠友過從十忘八九惟窮筮往事乃是千

萬人吾往底氣象雖甚疲軟激仰容有已乎懷戀高風殆愈久愈新也即茲田雅袖傳珍緘謹審伊來省餘動止對序增衛晨昏暇隙玩理存省日有事在遠外翹誦况乎若親近下席叅其緒論也益漸敗賤狀無可奉告夏內嶺表之役蓋亦煩鬱中所發非有宿營者而既已如是則當初準擬略修人事而歸矣事不協意徑易言旋心常耿耿其間逢山石老友又得艾山溪南二文書乃知緣我無狀致得僉君子虛費勞攘者尤切兢惕耳新寓事係是老境風霜只得任分而已

答文永煥

桂洪○辛丑九月七日

薰葭白露秋色百丈自不勝伊人之懷也際茲賢季叩門手命落案謹審間來動靜履用一例珍勝中所經歷聞極駭惡人之無良胡至於此蓋自變亂以來吾類性命如集于木莫可一日放心要之耳無聞目無見然後可帖然事定奈何教文字既有露拙者已爲入覽則庶可追悔於非其人而有改圖之舉矣今乃不然而重有云云何其不思之甚也還切愧歎

答金瓚振

相翼○巳亥十二月五日

前此賦別蘧蘧一夢境也鄙之伎倆曾所目擊不足

置有無之列而茲蒙記念垂以存訊其意尤不可忘也謹審伊來侍事增衛佔畢有常慰浣曷量示光彩英華何言之過也健忘太甚固不記所言之如何而既是在枝葉上說話都無真寶可據之地望更入思見教不須作循例贊歎語也僕依前慣劣無足奉瀕

答梁汝正

在慶○戊戌十一月十八日

三度文字非敢忘也手拙居先性懶次之稽緩到此雖極通慢幸少加寬容則當收拾患難餘悸率以奉副也院址云云絕非淺見所可左右而目今異端鬼教之宮遍滿境內莫之誰何天日重新光復院樣俟

河其清則與其豎碑而別無意想寧隨其事力營建祠宇春秋芬苾以為先事之本恐合事宜而在不尊不信之地僭易杜撰亦涉惶悚惟在貴鄉僉君子財處如何耳鄙家亦於影堂舊址營建數架以為鱗次修飾之計而開化輩尚無執言之端近處尚然况遠方乎只國內物情漸就漸削大小事間萬無如意之望為可悶耳

答朴學中 麟鎮

令詞能善課否見其手書知坏璞已成為之慰喜匪擾聞已乾淨甚幸而彼固吾先王之赤子不勝飢寒

而遂代為盜賊者是仁人之所隱也惟諸士友雖萬
被困厄而能不相染是可大幸

答李寬汝

承愚

蒙此先施縱無一面之雅而其秉心之忠厚令人可
感顧此不佞徒竊虛名內實空空且貴鄉一二士友
相從有年愛不知惡而今座下繾綣又致如是內省
自疚實不知何顏對諸君子邂逅之日也士生斯世
有志者鮮矣而座下識趣之高遠發於文辭有不可
誣則其所以進德修業想不待他人之勸勉而始加
努力也明矣惟願一承權輿以期九仞之功如何

答李玉見

現圭

珍重一函來自天外揆分度量極知不堪且以字句
疑端有所云云而欲其評證則顧此空疎又何措手
蓋庸學首章謂字在字驟者或似有微義者存而其
實只因本章文勢不得不然別沒緊要於其間來示
下學所易知上達所知實云者恐朮之穿鑿不甚觀
貼蓋時人不知性道教三字之各有義例而混淪說
去則不得不發明其所以為性與道與教之義而下
謂字矣明德新民止至善為三綱領而對舉則須各
其以在字立言以明其逐段致力之意者在所不已

鄙見如此未知如何小大祥祝有事改措盛教誠然
不容改評

答金京老

卷九〇乙巳五月五日

每擬識荆政不容易邂逅適願寔出望外天下事未
可懸度者有如是耳即茲令胤左顧珍絨落案披展
三復慰當對討至若時事倒懸同舟遇風豈曰晏然
所恃者天而已益數朔餘儻不言中蓋多失攝一自
歸棲百骸俱率眠食俱不便利只得以此就盡亦其
常事奚足云言臨遞艱草

答梁文五

奎煥

貴宗叩門盛問出袖爛然溢幅可敵對展顧此陋拙
坐餉厚眷不已過哉且患工程之不篤而有望提擲
則尤非率易可奉承者只當就前人見成法門朴實
頭做工則門路顯在眼前不容問人決不當遲疑等
待玩愒歲月以自欺而欺人幸勿以老耄之言而棄
之也

答金子惺

真敬〇丙申五月三十日

戀德方切茲奉惠帖反復津津有以見一片靈境安
閑整暇無毫髮波動走作之意其所以警發昏惰不
啻千金而百朋矣若是乎朋友往復之有益也謹審

比來侍學珍相不得不措之意溢於言外健誦何既
重翁易簣安做之痛固無彼此之可言而况如僕者
專門依賴殆若父兄竊冀其享年無疆用壽斯民豈
料若是其天禍吾黨悵悵無歸宿耶此老平生人雖
不識鬼神其知之天地其臨之矣片言隻手回幹將
墜之斯文使後生不學得有所依據憑藉至不淪胥
之功庶其有不食之報而視天夢夢未占其期尤可
悲也鶴軒記文蒙此提醒不敏之咎無以自贖而事
已遲稽少俟下回如何

答文勉之

台煥○辛丑正月二十六日

鄙人空疎伎倆不足有無茲蒙尊慈寵以全玉屬意
鄭重奈所施者今人而非古人何十分兢惕不省所
措而至若謙虛納污之盛則殆願學而未能斂衽庸
有既乎時象倒懸人心士風之日就污下政吾輩之
所當硬著脊梁處而傍無強輔杖拾不上只殊歲月
已矣無及尊慈則不然觀於辭旨筆力極有自強不
已之勢此則程先生之尤所深愛者也健誦何量強
疾手戰不備尊照

答洪允深

承源

示退箴講習之云深仰雅意之卓然而惟講習有方

當今理道邪橫之日惟所急務在乎節義廉恥四字
惟其有節義也故不屈於禍福惟其有廉恥也故不
染於邪淫切願推此以究到底扶正如何如何尊先
墓文構呈但處拙不足爲證後之筆甚可愧耳

答洪士拯

承煥

見書知盛工造詣不淺慰喜何已蓋人有三幸天賦
之初不爲夷狄禽獸而爲人一幸早蒙父母之恩能
讀書知文字二幸得有賢師友能使我爲聖爲賢三
幸然得其一者天下皆是也得其二者則十而有一
矣得三者則千萬而有一焉今賢者既得其二而

又得日新松沙而賢師而依歸焉蓋兼得者矣有此
三幸而學不益進者只可責乎志而已苟志不誠篤
而泛泛從師友則雖孔孟與居亦無如之何矣小學
是立志之書也故聊復妄言惟原諒記末索居窮山
無一長可相聞愧然耳

答崔淳若

潘立○丁酉九月十八日

僕也蹇劣猥託蓬麻於尊父子間過從徃復真老境
光色千里涯甬雖不能至中心藏之何日可弛迺者
珍重教命不幸爲偷兒輩所弄一場替面歸諸落莫
焉則殆憊然失圖不能定情謹審年來待餘佔畢有

相進供水菽退習詩禮兒寬董生不獨專美雖西鬼
輩萬萬何能蟬蛻於其間為之仰豔僕行年七十一
樣見惡只得以此蓋棺何足言李友冷節脩程蕩失
資斧誠不知做何計料而可利涉也浩歎奈何

答閔成夫 致教

取友一鄉不足則推及國與天下何嘗非古道而至
若賤陋迺眾所共惡者耳未知左右奚所聞見而訊
及千里之外也書既見失固未知裏面曲折之如何
其處我以不棄之科則的然矣將以何辭奉副至意
近而溪南先生遠則丹嘉諸長德在焉講質儀式不

患無就正之地矣最所恨田則吾一片靈境上自有
好師友勉哉夙夜有以超拔於衆沉懷襄之中則亦
豈非吾黨之光榮乎區區願言垂死殘喘蒙此分外
感慰之極不容無謝略伸衷曲庶應照亮

答鄭胤祚

鴻錫○戊戌七月十五日

秋氣襲人鄉懷可想千里脩程勞攘二字猶屬歇后
深庸貢慮僕積瘁神精有同四體不勤悶憐何言先
集弁文忘拙構副而言淺文短不能發揮出先輩志
事之萬一者為可憐攜手之教政是好會而牽掣多
歧亦難遽然不得不留待後日耳兒病有進無退決

非小小藥治所可收效只可以此待盡悶憐而已

與金仁仲 春善 ○ 癸未九月

一自尊王父大爺南遷之後雖不得裂裳裹足作數千里行其用幾日之力伸慰左右情地則奚啻小事而滾汨頽闕有志未就傷義悖情莫以加矣愧恨何可言即者秋設重侍震良百衛海上問安間承何若瘴癘水土百惡俱備以左右出倫之孝誠想不得一日而安於寢食也然天道無親唯善是與安知早晚無雷雨之解日月之更也惟益講文學益勤德業不負庭訓是士友區區之望也推過之節不須問也而

省齋文席既移境外若爾知舊自贍不暇則尤何望餘力波及言之無益為慮實深損友去年遭舍伯喪日月易得常事已過俯仰單隻無以為懷重以親瘠類復寧日恒少甚切焦悶去島中書茲以伴呈因遞轉達千萬幸甚

與金仁仲 戊戌四月三十日

先集編摩頭緒何居為先分定書手草成副本政其急務而各自滾汨會同未易良可悶也蓋先生文字廣大悉備有難涯涘而要其大致推明道體之本源劈破俗儒之膏肓使華翁明道闢邪之功致得不墜

於地者雖謂之有辭萬世可也亟宜登梓布人耳目
誠可急不可緩者則座下今日事可謂先立其大者
而繼述之當務也甚盛甚盛只全帙經營事不容易
則姑簡拔其大篇去處規模條例略如華翁集成法
餘外未及鱗次以續別已例隨機結梢似甚穩便而
未知諸友之意又以為如何耳向教弁卷云云此殆
涓流而議滄海之廣培塿而望華嵩之峻何敢當無
已則竊欲構數行跋文以寓景慕之意庶可俯諒發
文事無實先聲亦所戒慎須逢一二人可合商量者
對面說與然後可乃議到未知如何

答李公信

相珪○甲午八月十八日

即奉手滋可敵對展姊氏緬奉竿頭事勢若非出入
底誠力當為即為何能如是其容易耶甚感戚下長
時涔涔苦無好况中第三從姪得疾天殞悲慘不可
言八朝之內三次喪變何其酷也時事至此流涕痛
哭尚屬歇后俯仰上下只切苟活之耻而其間職名
尤極駭然知我者謂無損益不知者謂之乘機經營
謗言日騰如其平日言行毫分見乎於人則又安有
如許云云耶固非自及處也來示云云可謂先獲我
心未盡之義亦望鱗次示及也

答宋原明

哲憲

○戊戌閏三月十二日

前月九日恭奉惠書辭勤禮卑見屬過重有若謬致
恭敬者夫不面先書古道也前賢多用之然皆於道
德博聞可事之地故屈已下之而不為過也若益鉉
早涉塵臼中罹禍網絕未有卷帙尋數師友磨礱之
益七十無聞不免窮廬之歎座下何從何信而有此
過禮之禮也殆惶感無以堪之矣抑區區所依仰仁
門而不敢自外者則有之見今二儀昏濛人斂易位
一天之內四海之廣罔晝夜頷頷無往非計功謀利
之說無日非無父無君之教如非尊府大爺扶持鎮

壓而有猛虎在山之力者難保其國勢民心之尚此
維係而子遺衣裳得免淪胥之禍也雖甚愚昧可不
知所以然乎高山景行實不淺歎但老病杜門無以
遂執鞭之願是庸焯焯竊聞座下才明意美學問淵
博是尤為吾黨之幸然感德脚下責任愈大幸座下
益讀已讀之書益講已講之義不以時勢險夷物情
平陂有所勸沮弛張而培壅大來之基者豈非繼述
志事之一大擔著乎昔尊先華陽先生當中華顛覆
之日昭大義於萬古今之時非伊日之可比而其取
以為功者有百倍之難則又當加百倍之力然後可

以企望得十分未知座下以爲如何猥恃知照信筆
及此還切悚仄齋記此非急務但使居是齋者自強
不息則君子之齋也悠泛無事則衆人之齋也豈外
人可得以名也耶唯從事於可記之實而矻矻孜孜
焉雖欲無記人亦樂爲之記矣况不佞之託契深厚
者又何足言也自餘只祝因時加重以副士友之望

與宋原明 丙午正月

禮書外夫復何言自聞先生承 召入京憂慮萬千
耿耿不寐今未幾日凶音忽至嗚呼天乎此何報也
邦國之著龜亾矣士林之棟樑折矣凡有血氣者孰

不隕心而挺腦也况以哀平日純至之孝奄遭巨創
於逆旅蒼黃之中徹天刻骨其痛可想衣衾棺槨何
以無憾萬年宅兆又占何地惟節哀順變無至以孝
傷孝是士友區區之望也如益鉉者雖在陽界一未
冷尸耳病固難強豺狼四塞出脚無由茫茫宇宙此
恨曷極只羨先生之長逝而已揮淚止此願賜哀照

答吳汝敏

聖考○癸卯五月十四日

遠蒙不遐垂以德音厚意可忘益年迫崦嵫成就得
懶散無所肖似之身來教稱引過當是必未俗浮澁
之人有欺座下者不究其實而輕信之或爲明者之

累千萬諫察至若自列雖出於謙虛之意於以見向道之篤內省之密志氣不與年齡俱衰如此不自滿是問寡問不能又如此此蓋盛德者之所能自顧蹇劣十駕不追仰望欽歎不能自己教先蹟故人祖考同已祖先之地敢不極意奉副而奈手勢本爾拙涉末由展拓且夫此等去處只以傳來文獻填以本孫名啣似可近實不必借語不知何人而駭於傍觀十分更商歸於寡過之地如何

答文奉卿

圭政○丙午正月八日

文字之役係是孝子慈孫十分致慎處捨却境內之

巨匠而必區區謀及於不直一文之枯槁病筆得無不思之甚歎盛念難以終孤安犯奎乙至若世系子孫之未及者自有狀文與壙誌不必架疊故姑略之幸別求作家無貽累先德如何

答權君五

戴奎○辛丑五月

年昨東遊甚欲歷覽頭流而行色草草竟失所圖即奉手教追思悵然謹審年來棣况佳勝滿紙滾滾無非警策人處而其所本領未固悔吝山積之喻以若座下昆季之篤實問學豈有如此者抑因此加勉之餘又欲使我警策也耶然則其厚意何可忘也至若

各主分立云云除是陽九之會抑揚予奪之不得不
使然亦非人力所到奈何奈何益年老頹衰日甚一
日而遽哭從弟痛悼罔涯自餘病昏呼倩恭希崇照

答權君五乙巳三月

尺紙稽覆動踰三載闕茸人事雖或恕諒心其可安
茲蒙不較德音審間者經腴起居珍重尚志林樊雖
云素位綴旒國脉結梢至此吾輩之安身立命頓沒
其地則座下惻怛之情亦不以苒布巖穴而為淺深
異同矣浩歎如之何益兩被拘拿再入虎窟于東于
西辱莫甚焉聖人之以老而不死謂之賊者豈亦此

等之謂歟只切愧汗已耳

答文士鏡

圭性○辛丑八月十七日

反復發意求道存性之次第節度有可領略為之健
誦白蓮集病未卒業重以三夏飲暑逢秋未蘓長在
束閣承此勤命極切顏駢而事已遷延幸少寬日月
勿用深誅且聞古之君子思所以顯其先者求諸已
而不求於人務其本而不貴其末使光輝昭融無幽
不達乃第一等道理此在座下已見之昭陵而遠地
蒙眷迥出尋常不可無一言以報妄茲架疊

答慎景軾

宗麟○丁酉九月三十日

千里先施旨意鄭重雖未敢當有以見高明勤學好問之盛出尋常萬萬由是以徃四海之人皆將于于而來告之以善進益其可量乎甚善甚善僕棄海餘喘重以衰頹日用事為大忘小遺不敢以文字役自居者久矣矧如尊先揄揚世自有黎眉大手何不十分商度而至有此過舉也只切悚惶耳念昔朱先生辭人誌狀之託而深勸其繼述志事使人謂君子之子者其旨深矣幸益加勉旃

答閔景構

肯綮○辛丑

朝耕夜讀心力俱勞此在吾儕分上自是當然而天意茫然人事日乖只麼推過似不克為料奈何奈何唯硬著脚跟益講已讀之書益勉已能之業有光先德是遠友區區之望耳僕新寓生受不須言一天之下其不能如我者又何限焉到處安身只患無定力耳

答孫文叔

永烈○丙申六月一日

時變到極百萬生靈頓無安身立命處究其源流決非朝夕間事滔天之禍萌於涓滴烈崑之災始於一吹理本如此焉有引賊入室而能扶持君親保活宗社而享用太平者乎所以販君賣國之徒晨夕頌

頷文臂頓顙於倭洋膝下而不以為恠也如非天佑
宗國大故廓清則衣冠之傳舊也髮膚之保存也斷
無其望惟杜門自靖勿出戶庭庶或可矣而此亦非
大談一場所可辨得奈何奈何益七十殘年重經劫
運又未知何樣事機伏在不言只當任之而已

答孫子翼

永謨 丙申六月四日

龍仁持敬敦學相將此何等勝事雖西塵充斥何憂
之有過境困苦真所謂人間萬事無不有者也然要
其大致則人生百年枕刀宴安非生地道路奔竄非
死地一時无安之警又安知非仁天玉成之意也耶

書室記文今不記所道云何而覆瓿外無他可用承
茲匪分之教頓覺瞿然耳時事言之短氣寧欲溘然
者久矣盖理既缺闕於慮善之始則事莫填補於受
害之末者自古已然奈何奈何只恨山不高水不深
而臭穢聲色時入耳目也

答奇稗學

教行 乙未九月三日

頃歲返旆謂或更展竟失所圖悵何可言繼而東徒
肆惡聲聞宏大雖料無狀輩之亦具人心不可如何
於抱經守窮之士而相愛者存未始不馳慮憧憧今
承來諭始信愚見之未甚差忒亦以驗高明平日定

力出尋常萬萬慰荷曷勝霜意漸緊未審近日事更
如何重翁之典型日遠同門之分裂到極前頭利病
將未知如何出未浩歎奈何時事疑信相叅雖未克
詳生不如死吾儕之謂也

答權子德

載采○辛丑五月

頭流固所願遊而昨年則成美果左矣引領南雲未
始不往來於懷緒中適者拜函尤覺焯焯發書後序
已易矣壽闈下保畜如故滿室冲澹懸懸二字却例
語也不須提惟涵養窮理未能的確之云果知未能
是能長進消息凡道理壅闕不得一條路見前處是

著實下工夫底為之健美益新寓定峽辛酸不一而
恒切故山之懷奈何

答權應韶

鳳鉉○辛丑五月

元月書今始作答其勤慢不止三十里如此者無或
遐棄否乎憑詢蝸月日早罕比侍餘經學一直慥慥
如書出時未馳溯南天正爾引脰益離鄉索居枉被
遠方士友來顧有時乎不堪酬應之多端是則老不
學者常事多愧程先生無損盛年之訓也示中責已
不如責人之厚非惟座下舉俗無非如此而惟座下
則為能從事於東萊先生躬厚薄責變化氣質之法

以之勉勉推以及之能令老耗者開眼轉青此實警
惺處也

答權應韶 癸卯十月

多少謗言苟有尺寸見乎於人者奚以致此君子有
終身之憂無一朝之患者乃是前聖人開示後世之
眷眷至意而惜乎少不自力到老追悔何補於事惟
座下視為前車及時砣砣無或一刻放過是朋友之
望也嶺外紛紜近復如何須硬著脊梁毋或如賤子
之柔弱不立而犯不韙之科也生於東方而冒犯先
賢者雖三尺童子其誰信之耶

答魏致明

赫基○巳亥七月十一日

䟽事喘息苟存不容愬然聊以見犬馬之忱而已有
何毫末利益補效於燃眉倒懸之勢耶只自痛歎所
可慰者得高明於千里遠地託契蓬麻往復上下已
是暮境光紫而且承尊門僉賢拔例致意樂與反覆
自顧菲薄得非踰濫者乎然因此而略悉其芝根醴
源堅固活潑有以占異日大來之基而自不已於鷄
鳴風雨之懷則僕之受賜不但以偶爾言也

答魏雲汝

啓龍○戊戌十一月二十五日

天地間萬事一箇誠而已人或以一時好意思做向

上工夫到得稍用力後便生厭怠意不肯切實下工
究竟成就反不如綈裨之有秋者多矣唯牢緊脚跟
不為有利而勸不以無名而止然後庶不為半上落
下之歸也此乃愚之所到老悔悟欲為追補而不及
者漫茲告及想或恕諒

答趙聖寬

鍾極○戊戌三月七日

世間萬事須臾變滅不足置腦中惟有窮理修身為
究竟法此曾所聞於先生長者而性凡志懶雖不
踐行聊為哀座一誦之未知如何

答趙誠立

鍾應○戊戌三月七日

古人云美質易得此是元氣未淆漓前說話以今觀
之難得者美質如左右既得之美其可不盡心乎惟
願努力以副遠望

答閔景朝

柳楮○乙巳八月五日

旅館將迎值此衆中脉脉相看兩不盡情餘悵在心
曷容云言蔡君左顧惠存入眼深賀履用之萬重記
未始焉不量而入者無恠其顛沛到此而至於國計
民憂之不知稅駕何地則未死之前宵中勃勃自沮
過不得是亦癡頑之餘習奈何奈何豐聲載路人心
稍可一晝夜大風不無敗稼之慮貴邊形止更如何

答禹道瑞

恭榮○丁酉八月二十五日

前此雅意已見彷彿今承示諭益驗其向上靡懈之大槩慰幸不可言僕之愚陋亦非專然無意於此事者而行之不力老矣無聞數十年間事都歸於茫然赤地悲歎而已只他人有善心實願聞故間對朋友或陳耳目所及庶可諒其本情若責以賜誨等語則非其倫也惟接續不間斷毋恃其所已能愈勉其所未及是不亦目下急切者乎

答元文三

禮鎮○甲午四月二十三日

竊念足下離親戚棄墳土寓食中路雖緣事勢之不

得進退而其志則將以有為也當此人歟雜糅之際其能辦得舉世所笆籬之冷淡家計者復有其誰心焉歎服未克暫弛而但老矣無聞不得助下風者為可愧耳近日所課見在何書栗谷擊蒙書及塾教篇雖屬已慣不妨終身誦習昔我重菴丈見久來學者則雖老師宿儒必使勤讀是書以立根本先輩得力推可想矣相愛之極漫以布告幸望恕量鄙宗見由三方云故使之歷訪貴門其人天資甚美可與共學而只地遠者為可恨耳

答魏大彥

瑋植○戊戌二月二十五日

賦別六七年公私厄運真一場滄桑也人事乖亂則天之降罰固其宜也至若讀書志固窮修潔之眇末常布如左右者有何不吊而其間草土之厄師友之禍反復相因于海于陸備嘗不堪聞不忍言之多少境界者抑何理致來書之及自不勝潸然出涕未知顛沛流寓之餘書琴杞菊頗自定頓而有長久之計否節節奉慮益當主辱臣死之日苟全性命息偃自若殆可謂無人心者也何足言金氏文字曾於他人家事耳目所不及處亦或有過不自量而率爾應副者况在左右之勤教而可愬然乎顧其家蹟難可

準信寶鑑黨籍亦無平日涉獵不可輕易犯手竟致實來虛往雖若可憾此等去處只得疑以傳疑不容絲毫人為於其間者庶其為寡過之道也未知如何

答金武卿

漢文○戊戌正月七日

世變到極人心胥溺自是無足恠者而惟方寸上理欲消長敬怠勝負乃吾輩急切照管處朱子所云不世之大切易立而至微之本心難保中原之戎虜易逐而一己之私意難除者良以是也目前事樣政是自救不暇奈何奈何記末衰削中脚氣尤甚計以一月惺惺無幾只得以此畢命耳

答朴允常

泰亨○丙午九月二十二日

淵翁喪事痛均朝野莫可定情況在坐春立雪而充
飲河之量者乎臨風引領徒切悽黯惠存落案從審
近來篤老侍養連享康迪餘力課程有見於言意之
表者不可誣矣慰感何已鄙人坐在虎窟偃仰屈伸
未克自由中只緣水土不服舊疴新恙式日層生未
知末梢之如何究竟耳

答余永曾

律相○壬寅七月二十七日

分袂已久遽當聽蟬之候懷仰高風何嘗少弛益日
前抵朮禮華嚴寺今將啓歸而旅狀依昨幸也俯託

家狀題跋實出詢莩之盛意義不可固却故遂犯添
足之譏幸供一晒也

答余孟緝

敬燁○乙巳八月二十三日

喪中讀禮古訓有之奉書有以知饋奠餘劬經不輟
實慰遠外之想也益以淹漠館動經歲年不售微東
只是狼狽而歸衰病纏甚日俟符到而已顧今海陸
浸浸蹄跡遍境加以薙髮之禍所謂皓天不復憂無
疆焉者是也雖百道窮蹟固守舊樣至死不變是吾
輩究竟法也如何如何

答李應和

圭在○辛丑十一月六日

菊秋款扉寔出望外心乎愛矣俾也可忘言旋未幾
又致珍函一書猶云慰感又况再度繾綣迥出尋常
者乎顧此老朽愧無以承當其萬一也第於鄙先祖
影堂營建事焯焯苦心始終不替尊賢尚德固其宜
也而迨此叔季擔此重任者果有幾人於區區欽仰
記下殿門蟄伏日事呻吟明春落成之叅亦未可預
必耳幸望多士同心以完大事如何最爾河東安知
不為異日陽復之基本也歟開基告文辭旨甚好無
容改評此後六偉文與奉安祝亦與溪南一隊相議
則庶不當牢却矣

答李安普

嘉洙○乙巳四月四日

來而無覆動踰三載病廢人事設或恕存如物梗喉
心其可安荐奉委訊尤感不較之盛也示喻分外吹
噓大不著題其然豈其然乎蓋當此之日雖在匹庶
之微草茅之賤其奮發淬礪畢義願忠為不扶之扶
者乃秉彛所同則奚有別人獨任其責而肯以流傳
巷語妄為矜夸者乎是則座下之論殆駟不及舌而
徒取傍人之竊笑也病枕叫苦言不盡情

答鄭說和

癸卯九月

風雨世界苟全性命亦無疆之福也自夏涉秋履用

珍畜庇內均迪慰流良淡年形少康天意有在而物
價翔踴人心日異念及公私只切無疆之憂也先丈
文字雖在老昏念到事契曷敢辭諸有時忽擾似未
克趨副幸少寬日月以待下回千萬

答李原禮

鉉五〇辛丑五月二十三日

二先生道義事功所以爲扶持世教嘉惠後學誠如
來示而世鮮知德壹鬱不伸久矣雖在異說肆行之
際駸駸有形著動變底消息真可謂陽無可盡之理
也而顧如愚拙浪竊虛聲徒欺視聽自不勝汗背而
頽頽也情外推獎得不爲賢者一言之不知也耶

答曹應元

在奕〇壬寅十月四日

幸茲識荆雖遂素願而到頭稠座話不盡情歸來頽
頽發於夢寐者多矣乃者令季委存珍緘入手披展
三反慰當合席矧於其間棣床起居一例鄭重者乎
兄弟無故三樂居一是知專門積蔭斷非一朝一夕
之故而將來餘慶不可涯量其在相愛之地所歆聳
動情視爲矜式者曷有窮哉願座下益讀已熟之書
益講已知之義晨昏自強勿使悠泛是老友之望也
僕衰年光陰無端費送於道路奔忙中極爲可惜奈
自取何

答卞仲剛

錄○乙巳四月四日

昨冬枉顧洛下已極感悚而數月之間再令賢胤遠訪繼之以寵翰溢幅繼繆認出情訊披覽再三脫然如沉疴之祛體也矧審經體以時萬護者予為慰不淺益鉉自還山以後病日益重陽界寄寓似無多日死固甘心而但素志未遂不能驅犬羊而友為所驅豈不切憤乎可謂死不瞑目也俯教豈有一二近似者乎只自瑟縮而已賢胤相對雅容可愛而文華夙成儘見其教之有方也但留未幾日旋又告別還切張缺

答卞仲剛

乙巳十月二十三日

向枉迄茲感荷即者二君聯袂甚覺眼青因拜惠函詳審間來經體珍勝慰幸可言所慎皮膚所關可自勿藥而坐起周旋大是難忍則旋庸貢念益鉉依前漸頹無可奉聞時事言之疾首切不欲掛齒牙間矣至若處義之方則飲水者自知冷煖有甚別道理尚寐無聰猶屬歇后奈何奈何先狀文字萬非其人而詢莛感意不敢終孤奎乙亂草徒玷先德幸加繩削無至大段礙眼千萬千萬

與林伯崇

爽榮○甲辰七月

向枉迄茲感領何敢忘也潦炎才收秋氣襲人伏惟
闈候寢殮康寧味經起居亦復如何時事入耳者無
非駭然處悠悠昊天此何人斯糞土餘喘露出朝紙
箇中曲折究說不得而兼且事面有不容坐而防塞
替送家兒使之數行辭免而未知究竟之作如何樣
耳向教短序尾續陳腐以俟斤正幸勿以已成說話
而置諸泛然之科千萬

勉菴先生文集卷之十

